



ル 6  
2529  
41





門  
號 2529  
卷 49-41

吉林通志

吉林通志卷一百六

人物志三十五 國朝二十

珠勒格德 烏什哈達

阿爾素納 武登額

額勒登保 哈耶阿

全德 明德 子郭全

安福 傳陞

努三 富永

珠勒格德姓鈕祜祿氏吉林人隸滿洲正白旗乾隆三十八年以

吉林通志卷一百六



乾清門侍衛從征金川參贊大臣奎林攻斯第中飛石  
有兩賊橫刀趨之珠勒格德殪以連矢餘賊驚潰

賜號扎克博巴圖魯擢頭等侍衛進攻俄坡賊穴礮後以守  
擊之逸去我軍旣取木克什山設水卡斷賊汲道而  
設伏於旁賊二百餘乘霧來犯伏發敗去別有賊百  
餘來援逆擊之手刃三人攻木克什山下三礮克之  
與都統和隆武等襲取日旁山後戰礮十數平礮二  
百餘日旁山近勒烏圍東接谷爾提爲後路必爭地  
復乘夜與和隆武攻據之授正紅旗蒙古副都統四  
十年攻取達爾圖及得楞旁近各礮師進石真噶拔

石城戰礮二木城一攻焚丹扎木各寨賊踰扎烏古  
山來援乘勝登山梁擊之賊酋中矢遁克爾瑪之賊  
棄礮寨竄追擊至曲碩木山寨攻什扎古克木城一  
而扎烏古山梁礮四卡八並克日斯滿至巴扎木山  
險礮多尤賊所恃與和隆武分兵攻之和隆武仰逼  
山梁撓賊珠勒格德由箐內繞擊克礮十有七於是  
甲索一路官軍聲息始通趨達徹谷山賊列寨嚴守  
分兵攻旁卡而自擣其中寨擲火彈焚之斃賊無算  
遂進克乃當獨松卡拉爾舍斯滿番眾悉降明年凱  
旋



賜銀幣圖形

紫光閣

御製贊曰奎林深入賊刃將及發矢斃之險中救急同心合力共集大勳寫圖旌武悼史流芬四十四年卒

烏什哈達姓伊爾根覺羅氏吉林人隸滿洲正黃旗  
乾隆二十八年以前鋒藍翎長駐防伊犁尋擢前鋒  
校三十二年從征緬甸有功

賜號法福哩巴圖魯授侍衛三十五年從征金川攻克巴朗  
拉山賊卡旋爲賊奪項之復力戰取焉殲賊甚眾進  
破克資哩賊寨擢二等侍衛尋授正白旗蒙古副都

統三十八年攻昔嶺大碉克之又克羅博瓦山碉卡  
詔獎其功並

賜物四十年連奪雅瑪朋瓦喇占等寨柵明年凱旋授騎都  
尉世職兼一雲騎尉

賜銀幣圖形

紫光閣

御製贊曰有足如鑷有手如翼削壁尖峯行無難色領隊奮  
勇屢克碉堅羌兒畏之若雀遇鷗尋授和闐領隊大臣坐  
與辦事大臣德風許於

朝降侍衛發烏什邊卡效力四十九年授頭等侍衛虎



槍營翼長五十二年授健銳營翼長征臺灣諸羅至  
府城道多梗於賊悉平之

賜還巴圖魯勇號明年大軍抵瑯嶠領水師會圍擒賊首莊

大田

詔獎其功師還圖形

紫光閣列後三十功臣中

命詞臣爲之贊曰金川領隊不畏艱岌領水師兵豈亦所習  
連檣海口合勢圍急大田就擒志堅功立授吉林副都統  
調齊齊哈爾副都統熊岳副都統五十六年授鑲紅  
旗蒙古副都統從征廓爾喀師還圖形

紫光閣列後十五功臣中

命詞臣爲之贊曰金川攻碉臺灣率艦兩樹戰功皆能奮勉  
茲在行間守禦是資凱旋論績並圖贊之五十九年坐  
召對陳征廓爾喀功不實斥戍伊犁嘉慶元年釋還請赴楚  
省軍營效力予頭等待衛戰襄陽鍾祥

詔獎其功

賜物明年扼宜城西岸賊七八百窺古河口殲其大半移防  
四川石柱廳偕副將達桑阿自甲溪攻白巖山賊克  
木卡一陳斬及溺死者五百有奇三年賊渠王三槐  
擾梁山墊江趨渠口白巖山賊與通三槐遽引賊數



千渡江以所部扼之江岸眾寡不敵殉焉事

聞

詔加等賜卹予輕車都尉世職子圖爾弼善襲夫

紫光閣古雲臺凌煙閣類也畫像其上世以爲榮烏什  
哈達凡三與榮亦甚矣顧當時功出其右而形不獲  
圖者不知凡幾非有幸不幸耶觀屢仆屢起卽其材  
亦非有異而獨以死自榮

紫光閣無與也死有重於泰山豈不諒哉

阿爾素納姓祿葉勒氏吉林人隸滿洲鑲黃旗乾隆  
三十四年以侍衛從征緬甸戰新街有功

賜號額騰依巴圖魯遷二等待衛明年從征金川攻巴朗拉

嶺偕侍衛額森特先登奪中山峯兩礮夜復與諸將  
攻山巔礮卡克之我軍遂越巴朗拉嶺三十七年分  
三路攻資哩偕總兵牛天昇自瑪爾瓦爾濟進奪礮  
十數有賊爲中路大軍所破竄匿地溝殲之殆盡參  
贊五岱攻北山石礮阿喀木雅賊自南山往援阿爾  
素納邀擊敗去進攻阿喀木雅賊夜遁奪緣山數礮  
又擊敗賊突來犯者尋由喇卜楚克繞攻資哩南山  
偕牛天昇分進牽賊勢進攻美美卡短兵陷陳多所  
斬馘偕總兵李煦樹柵薄賊大木城賊二百餘出犯



擊斬甚夥復偕副都統海蘭察夾攻之斬賊三百有  
奇大軍進貢噶誘賊與戰偕諸將四路設伏圍而擊  
之斬級百餘進逼兜烏山偕總兵哈國興等攻克穆  
拉斯郭大寨據兜烏山巔與總兵馬彪兵合攻旁近  
碉卡並克遷頭等侍衛加副都統銜旋授領隊大臣  
明年大軍至木果木與海蘭察攻賊兩大碉戰連晝  
夜卒克而毀之

詔獎其功時以所部駐兩山間賊二百餘來犯分道禦之賊  
敗去追擊至山麓奪石碉二益進逼賊賊窘復來犯  
逆擊多負傷遁尋偕副都統烏什哈達由達扎克角

下攻賊木城賊出拒斬級數十乘勝入據其城並克  
碉樓一石卡二授鑲白旗蒙古副都統進攻達扎克  
角山梁木城克之下碉卡四並殲箐中伏賊旋克得  
斯東寨及昔嶺對山木柵築礮臺於達扎克角高阜  
或攻或禦又十數戰斬馘以千計其夏回軍至大壩  
溝禦追賊力戰殉焉事

聞贈都統銜

賜祭葬如故事入祀昭忠祠子騎都尉世職兼一雲騎尉無  
子從弟某襲兩金川平

命圖形



紫光閣詞臣爲贊曰攻巴朗拉絕巘先登三軍從之以  
是著稱資哩斯當鷲若鷹隼大壩殺賊名彰身殞  
武登額姓瓜爾佳氏吉林人隸滿洲正藍旗乾隆三  
十八年以前鋒校從征金川賊於資哩築卡拒守隨  
副都統福珠哩擊走之斃賊甚眾明年攻下色溇普  
山梁木城並石碉十一進克喇穆喇穆多所斬馘尋  
隨參贊海蘭察自琅谷進斬級二百餘克碉卡四至  
凱立葉復大敗賊眾四十年偵賊宜善攻克其碉擊  
賊得耳谷又敗之明年攻柴噶爾博山梁克之金川  
平凱旋累遷至協領五十九年坐吉林濩務不理鐫

級嘉慶二年從征川陝楚三省教匪藍號張漢潮擾  
平利隨副都統賽冲阿抄擊於曾家壩大敗之冒雪  
逐北至竹葉關斃賊甚眾餘竄黑虎廟伏峽口要之  
斬級千餘箭殪賊目張世虎而黃號齊王氏姚之富  
擾甯羌州追擊於羅村壩大敗賊眾明年白號高均  
德竄洋縣龐家溝勦之斬賊二百餘賊夜走安子溝  
犯我大營力擊卻去齊王氏等竄郿西我軍邀擊於  
高壩店賊敗遁大軍三路圍勦逼至三岔河多所擒  
斬齊王氏之富墜巖死搜勦洋縣茅坪關西溝並有  
斬獲餘賊竄川境與藍號冉文儔合據渠縣大神山



進攻克之又克箕山賊巢斃賊無算四年漢潮餘匪  
擾楚境擊之蓮花石油房溝等處斬級百餘尋隨經  
略大臣額勒登保入陝辦賊遇賊甘肅岷州林江鋪  
繞出如意山左猝擊之斬賊以百數旋入川境敗賊  
達州之劉家壩積功復協領回旗二十一年授熊岳  
副都統道光二年以年老休致

賞食全俸九年卒子圖明阿二品廕生

額勒登保姓瓜爾佳氏

或云字珠軒非也珠軒蓋烏拉打牲戶名

世居吉

林隸滿洲正黃旗少從征伐為超勇公海蘭察所知  
曰子將才宜略識古兵法以不識漢字取繙清三國

演義授之遂為名將緬甸金川之役並有功游授侍

衛

賜號和隆武巴圖魯乾隆四十九年隨尙書福康安破石峯

堡逆回遷二等侍衛

賞黃馬褂五十二年擢頭等侍衛隨福康安征臺灣解嘉義

圍明年擒林爽文臺灣平遷

御前侍衛圖形

紫光閣

命詞臣為之贊曰中林效績健捷過人星馳飛鏃操刺罕倫  
直前披擊衝壘奮身龍驤備衛是謂虎臣明年廓爾喀擾



後藏隨福康安討之七戰皆捷攻克擦木賊寨事平  
加副都統銜再圖形

紫光閣

御製贊曰石碣木柵鱗疊賊防勢如捲簾捷似頽牆將軍所  
示無不領略率領精兵埋根卓鑠尋授副都統兼護軍統  
領六十年擢都統時黔苗石柳鄧叛松桃廳楚苗石  
三保叛永綏廳陷乾州福康安以雲貴總督視師請  
總味於  
高宗俾與護軍統領德楞泰率巴圖魯侍衛偕往師自松桃  
迤西進攻解永綏圍克黃瓜寨首逆吳半生據蘇麻

山寨攻之克其西梁半生遁追擒於高多寨授內大  
臣獲乾州賊目吳八月其黨據平隴師進長吉山擊  
敗賊數千來犯者嘉慶元年福康安薨代以四川總  
督和琳會三保就擒而柳鄧尙據平隴遂率師渡河  
先趨乾州復其城授領侍衛內大臣

賞花翎其秋和琳卒於軍統兵大帥惟與德楞泰及湖南巡  
撫姜晟

詔將軍明亮提督鄂輝會剿冬偕明亮等攻克平隴柳鄧遁  
據養牛塘山梁進克之斬柳鄧父子及吳廷義等

詔封威勇侯



賞雙眼花翎銀千兩明年班師當是時川楚教匪方棘遂由苗疆移征湖北轉戰鶴峯州建始縣連奪賊寨柵斬馘數千殪賊首林之華於巫山而覃加耀竄長樂之朱里寨卒未就擒

詔降伯爵戴單眼花翎三年春獲嘉耀

詔責不早蕺事奪爵及花翎褫職

予副都統銜赴陝協勦白號高均德黃號姚之富齊王氏蓋賊有青黃藍白綠等號云會賊目李全等自盩厔至藍田期與高齊合率師截擊之之富齊王氏失援遂殲於明亮德楞泰進擊均德均德竄商州鎮安等處

而藍號張漢潮由川入楚馳赴荊州禦之敗賊於竹山逐北至陝之平利縣又由陝躡擊至川之太平縣白號羅其清據營山縣之箕山為德楞泰所破因邀擊於廣元獲漢潮子正澂與德楞泰軍合其清竄據大鵬山合軍圍克之斬其清父從國其清遁巴州率所部追七晝夜及之擒其清並子若弟

賞還花翎

聖武記十三年圍羅其清於大鵬寨官兵立營山腹賊黨羅其書眾數千截我後路扼餉運額侯分兵回擊賊據堡力拒忽援賊五百餘由山後繞襲麾下侯勒馬橫立一矢洞賊胸背率親兵百人齊壓退賊次日擊走羅其書通餉運合圍大鵬寨賊犯總兵朱射斗營開壁大戰殺賊二千賊走據青岡山樹柵拒險侯偪柵急攻使賊不得修備持久侯距柵不及一矢席地而坐總兵楊遇春督官兵囊土立

吉林通志卷一百六

十



營冒賊槍斃死者死生者生壘立就諸營繼之連夜  
攻擊賊不能支復竄遂風寨據廢堡死拒無水無糧  
參贊德楞泰亦至會攻勢垂克薄暮忽傳令撤圍初  
更賊傾巢潰遁候遲至黎明始督兵馳追未三十里  
及賊逃竄過半追殺三十餘里至方山坪賊盡解散  
遂獲羅其清於石穴其竄散萬眾三日間盡為兵民  
擒獻是役也賊趨絕地咸謂可坐待其斃侯以困獸  
猶鬪黑夜中萬眾死突我兵豈免受創既遠近無他  
賊故開網縱之候其解散進勦青號徐天德白號冷  
飢疲就縛如探囊中物也

天祿於合州明年春

詔四川總督勒保為經略大臣

命以副都統與明亮為參贊大臣藍號蕭占國張長庚率賊

七八千自閬州竄營山力疾躡殲其眾斬占國長庚  
授二等男爵時天祿據岳池乘勝冒雨進勦天祿遁

廣安州追殪之殲賊眾千人於石筍河晉爵一等白  
號張子聰據雲陽率軍進勦子聰糾黃號樊人傑龔  
建等并力以拒別賊蕭焜又合綠號卜三聘等來犯  
連敗之寒水壩等處賊稍稍解散子聰復糾藍號冉  
添元竄陝我軍扼之逼回南江子聰遂竄通江追敗  
之苟家坪又敗添元於木老壩添元竄鎮龍關將與  
馬鞍寨青號王登廷合先擊登廷奪其寨逐北至大  
竹東鄉等縣齊家營別賊虜至因分兵擊之擒斬三  
千有奇而仍躡登廷不置其秋勒保明亮被逮

詔授經略大臣

聖武記既而德參贊往擊徐天德額侯馳擊  
包正洪扶病冒雨殺賊千計旋探知蕭占國



張長庚二賊萬餘據黃土坪其地南臨大江北倚觀音山蜿蜒百餘里東出三十里為城隍廟西退六十里為雞猴寨侯命朱總兵繞雞猴寨截其走路而自率楊遇春以大兵襲攻城隍廟賊果敗走朱總兵據險邀之左右懸崖賊無走路每二三百亡命衝笑出者積至千百復回攻及大軍追至夾擊賊斬賊大半賊先後逃出三四千下山越溝喘息時已薄暮下令曰賊憊且飢不及此滅之夜必狂奔又勞追勦我軍雖勞能賈餘勇者受上賞軍士皆奮夜圍賊於石岡偏下懸崖生擒四千餘眾斬張長庚蕭占國亦有薙髮冒難民以免者數百投入冷天祿賊黨訴額侯兵威之可畏冷天祿曰我屯安樂坪曾破勒經略兵數萬誰敢正眼窺我既額參贊軍不遠我止選先鋒八百往生擒之遂行額侯令楊遇春潛繞出其後而穆克登布兵二千據人頭堰以待自率大隊攻其中路以索倫勁騎傍衝之賊聚驍騎決死戰冷天祿斃於箭次日復追及其大隊萬餘於石筍河破斬大半旬日連殄三賊遂奉旨授經略

湖北糧餉胡齊崙餽送事發獨一切無所受

詔稱其忠勇公情為東三省人傑復授領侍衛內大臣疏言

徐天德經楚軍勦敗折回川東勢已衰弱而王登廷現與冉添元苟文明合又襄樊賊首阮正濬竄至廣元覬覦入陝目前賊勢川北為重臣未便再往川東應通籌全局相緩急圖之

詔聽其言尋率總兵楊遇春殲正濬等於雲霧山授都統其

冬登廷天德添元合黨來犯躍馬督諸軍力擊敗之獲賊目賈正舉等自巴州追餘匪入倉溪賊殊死戰我軍多有傷亡既而登廷為南江縣團勇所盤獲事

聞



詔額勒登保奏盤獲王登廷與所奏官兵挫折倉溪事僅隔  
一日使他人處此必諱言失利以登廷作為陳獲掩敗為  
功乃據實直陳不稍存諱飾而於團勇盤獲並不攘為已  
功洵不愧經略之任郎中胡思顯代司章奏以主將不欺  
遇事直陳

賞三品卿銜冬高戴馬羅各逆首由老林突入陝西城固南  
鄭等處奏督兵赴陝而以四川軍務交總督魁倫接  
辦因病暫駐秦州

遣御醫診視尋殲賊眾於甯遠伏羌岷階二州獲賊目陳正  
甲白號楊開甲等由甘入陝而藍號張漢潮餘黨仍

熾潼河失守

詔逮魁倫起勒保成都將軍與德楞泰剿賊其陝賊

責與尙書那彥成勦之於是率總兵楊遇春馳抵商雒道擊

賊追至兩岔河殲獲幾二千遂扼龍駒寨遏賊東趨

盧氏之路賊走洵陽設伏擒斬藍號賊目劉允恭劉

開玉等蓋漢潮餘黨在陝者略盡矣晉封子爵勦黃

號伍金柱於漢陰廳斬賊首龐洪勝等殲賊五千追

斬開甲洋縣之茅坪

聖武記五年勦楊開甲大隊於洋縣之茅坪賊踞山巔勢險峻侯先遣兵繞出賊營左右而大兵三路進攻繼率大隊擊大礮步步為營策應而進其三路之兵誘賊至大隊前五百步外大礮擊之五七十步外銃矢合擊之戰方酣旁山伏兵已繞出賊後乘高下壓前後夾



擊擒斬千餘 陝賊全竄甘肅兩當及徽縣而藍號陳  
楊開甲授首 傑仍偷越棧道將奔南山率兵擒傑斬級三千有奇  
又槍斃金柱成縣之夾溝賊首宋某據兩當者亦殪  
之於是移師西嚮而賊不據城池惟往來川楚陝交  
界萬山中猛竄疾馳趨向無定疏言賊蹤飄忽惟堅  
壁清野可以制其死命現川省堅築寨堡賊即不敢  
深入而秦楚兩屬結寨寥寥仍可恣掠請一律興築  
詔可因責以勦捕而以防堵責疆吏會賊逼武關冀入豫督  
兵截擊逼回西南六年勦黃號王廷詔白號高三馬  
五等於漢陰南山獲八百人斬千有餘級

詔高三馬五廷詔並著名悍目官兵既獲勝即宜專注此賊  
不可舍而之他提督楊遇春尋擒廷詔川陝邊界之鞍子  
溝復追高三馬五於甯羌州擒之並擒賊首王淩高  
等

詔嘉調度有方晉爵二等  
賞還雙眼花翎尋疏設甯陝鎮爲南山屏障當是時逆首著  
名者陝西則冉學勝伍懷志等湖北則徐天德苟文  
明等四川則樊人傑冉添泗王士虎等尙不下十餘  
起學勝北擾甘境自漢中入棧過之渭河又蹴之漢  
江南岸賊遁平利而洵陽復有白號張天倫等五起



合屯劉家河等處勢張甚遣遇春剿之擒賊千所殪  
倍之拔出難民數百天倫亦就擒遣提督穆克登布  
擒懷志於秦嶺添泗士虎復於通江爲遇春所擒其  
起事最久之天德學勝亦殲擒於楚蜀官兵而姚之  
富子馨佐及白號高見奇辛斗等方擾甯羌督軍西  
剿逼入川北旣而總兵楊芳擒辛斗於南江副都統  
豐紳等擒見奇於紫陽剿逆首李彬建州境獲其妻  
子及賊目冉添璜等別賊韓進文各率所部降賊勢  
日蹙因條上搜捕事宜

詔嘉深中肯綮晉封伯爵

賞黃面貂波馬鞋苟文明潛合高冉殘匪由廣元偷渡漢江  
竄入甘肅階州尋回竄廣元復竄通江殲之瓦山溪  
獲文明弟文舉等文明竄開縣大宵七年擊斬黃號  
辛聰於南江而文明由西鄉七星壩掠船偷渡漢江  
北岸疏請議罪降爵一等男戴單眼花翎旋

詔以經略大臣兼西安將軍專辦陝賊其川賊

命德楞泰勒保剿之文明竄入南山與別賊宋應伏劉永受  
等合且詐用官軍旗幟計陷我軍督師入山搜剿陝  
路險阻賊勢盛則隨地抗拒被剿窮蹙則翻越陡壁  
藏匿老林又多分黨羽條東條西爲牽綴官兵計其



夏痛殲之龔家灣文明僅以三百人跳免獲其妻子  
並誅尙民通賊者賊目永受亦爲村民所斃文明尋  
由川塘河東竄率師抄擊數有斬獲晉封一等伯  
賞還雙眼花翎疏言軍務將竣減撤東三省及兩粵官兵秋  
窮搜南山餘匪斬首逆張芳旋至平利與德楞泰合  
軍勦楚匪凡五戰擒斬大半駐軍安康紫陽東顧楚  
境西策川界冬殪青號熊方清於王家莊並於竹溪  
盡殲老林餘匪而穆克登布追賊通江鐵鎧臺擒首  
逆蒲天香等數人晉封侯爵時諸路就救殘匪分竄  
老林者或百餘人爲一起或數十人爲一起不足勞

大軍乃與德楞泰勒保疏報蔽功

優詔晉一等侯世襲罔替授

御前大臣加太子太保

賞用紫纒明年留陝搜捕餘匪獲馨佐應伏等於紫陽上善  
後事宜五則冬振旅還京

特遣御前侍衛郊迎行抱見禮於

養心殿

賞賚不次尋入川偕德楞泰悉殲餘匪以疾告

命回陝調理十年春入京

命總理行營事務充方略館總裁



御製詩以賜加賞銀五千兩大緞十六疋充後扈大臣  
賜紫禁城騎馬

命謁告

裕陵授崇文門監督秋

駕幸盛京恭謁

三陵成禮

詔晉公爵尋薨年五十有八遺疏至

行在

仁宗震悼涕泗交集

特賞陀羅經被

遣成親王率侍衛十人回京奠醊

賜治喪銀五千兩及

駕回

親臨賜奠

御製述悲詩一律

命將軍秀林修其吉林祖墓官爲立碑建專祠地安門外

賜名褒忠春秋致祭照公爵例

賜卹

予諡忠毅額勒登保天性嚴毅笑比河清諸將白事帳前莫

敢仰視然能得士心雖疲乏隸之輒變勇敢嘗語諸



將我軍條條生路惟拚命進戰是一死路賊條條死  
路惟拚命進戰是一生路欲以我之長擊賊之短惟  
有出其不意攻其不備一法故追躡必窮所向俾賊  
不得憇息師行整隊伍常若臨敵或倉卒遇賊後隊  
未卽至卽以前鋒突擊不使賊有成列之暇每宿必  
四路偵訶以備不虞臨陳礮彈常從肩耳過左右失  
色督戰益力尤嚴操守賞士巨萬不惜而不以一錢  
自奉督撫餽遺皆不受軍興久諸將多畜貨財凱旋  
過蘆溝橋雖德楞泰亦輜重纍纍獨蕭然行李數騎  
而已初有子爲侍衛卒得書方治軍不言亦無戚容

夜歸帳乃盡哀明日治事如故回京生子一

仁宗賜之名甫數月

賜奠時

仁宗取子至膝下

命襲侯爵踰年卒以弟子哈郎阿嗣自有傳或謂額勒登保

忠廉果毅足貫天人其子天亡雖修短有數而誅戮

亦不無稍過焉

哈郎阿郎或作琅父依克唐阿嘉慶四年從征四川教匪

有功授驍騎校

賞藍翎六年調陝西戰隴州草白峪陳沒以額勒登保弟



賜卹加等予雲騎尉世職哈耶阿襲十三年襲一等威勇侯  
爵授二等侍衛十七年遷頭等

命在乾清門行走明年河南教匪陷滑縣

命與副都統格布舍隨

欽差大臣那彥成提督楊遇春剿之既破道口迎拒之賊分  
七路進兵偕格布舍抄擊其右因合各路克道口殲  
賊二萬燬其巢面亦被創進攻滑城賊三千餘自桃  
源來援擊卻之既而援賊規入城城賊二千出應隨  
遇春衷賊力戰殲之靡遺以功

賜號繼勇巴圖魯凱旋坐攜幼孩鐫四級調用前功改留

任二十一年充奏事處領班較射中五矢

命在

御前侍衛上行走授正白旗蒙古副都統尋遷武備院卿兼

正黃旗公中佐領二十三年從

幸盛京坐武備院卒擅入黃布城退出

御前侍衛在

乾清門行走尋復故授正白旗護軍統領道光二年遷  
左翼前鋒統領四年造辦處玻璃庫災馳救甚力

賜幣

賜紫禁城騎馬六年



宣宗御含輝樓閱馬射中五矢

賜物逆回張格爾陷喀什噶爾四城

命爲領隊大臣隨揚威將軍長齡勦之明年偕參贊大臣楊  
遇春戰賊洋阿爾巴特莊旣捷逐北三十餘里殲賊  
萬餘俘二千二百有奇

賜物賊復糾十餘萬眾據沙布都爾莊之險以拒我軍三路  
進提督楊芳由右路而哈郎阿以騎兵繼之斬馘甚  
眾賊仍嚴鼓遂縱騎橫貫賊陳乃大潰逐北四十里  
殲賊無算師進阿瓦巴特莊與領隊大臣阿勒罕保  
以騎兵分左右會大軍合擊賊陳亂乘勢襲莊後獲

安集延頭目阿瓦子邁瑪底等擒賊幾三萬進渾水  
河賊數百人躡渡來犯擊卻之遂渡河馳逼喀什噶  
爾城圍攻克之張格爾先遁獲其孥及從逆伯克阿  
布都拉安集延頭目推立汗等斬級六萬俘四千有  
奇而賊目玉努斯尙據和闐師進昆拉滿以騎兵北  
由沙山抄出賊後與前三路合擊大破之多所斬獲  
餘賊潰遂克和闐破

優賚擢鑲紅旗蒙古都統其冬張格爾就擒明年俘獻

闕下

賜緙絲蟒袍一襲幣二端列四十功臣圖形



紫光閣

御製贊曰御前扈從心懷禦侮命中挽疆闕如虓虎率吉林兵衝鋒勇賈精壯堪嘉望繼乃父九年充壓馬大臣坐馬未調習鑄一級留任明年回裔復入卡圍喀什噶爾城

命偕楊芳爲參贊大臣隨長齡勦之師至賊遁疏言城圍三月糧糗無餘酌留守兵外悉令就食葉爾羌

俞之

命與楊芳察葉爾羌各大臣所辦理及回眾助逆情形尋疏復先是逆回滋擾喀什噶爾參贊大臣扎隆阿疏陳

回子郡王伊薩克有勾結內應情事

宣宗以事關重大

命解扎隆阿任並哈耶阿所疏伊薩克情形交長齡案鞫會長齡劾扎隆阿任兵民妄相殺戮

詔褫職研究

命哈耶阿護理喀什噶爾參贊大臣印務疏辭不允並

詔與楊芳妥籌勦撫善後各事宜及嚴捕著名賊目十一年疏言分別覈辦喀什噶爾附近從逆被脅回戶又東南兩路回眾先後擒送逆賊百四十二名及偵卡外



阿哈素魯有馬賊三百餘抄掠已令將弁戒嚴相機懲創

詔嘉之其秋坐扎隆阿誣陷伊薩克前疏陳伊薩克情形草率鑄五級留任時議行屯田資防守

宣宗以久歷戎行令暫留回疆辦理或駐葉爾羌或駐喀什噶爾與長齡等審量以

聞而浩罕伯克遣使求通商如故疏入

詔可因此責令縛獻賊目送所脅民回爲一勞永逸計明年遂遣使進表送喀什噶爾回眾並領安集延貿易人及貨物馬匹進卡宣示

威德許通商免稅夷目悅服疏入

嘉焉

命俟通商事定察夷情帖服於筵宴後回京其冬福建嘉義縣亂作授參贊大臣偕

欽差大臣瑚松額勦之未至事平旋師明年歷署鑲藍鑲白旗都統坐奏事處擅收無名封章未留其人鑄二級調用改留任十四年

宣宗謁

西陵總理行營事務尋授閱兵大臣明年閱山西陝西軍歸擢領侍衛內大臣冬山西巡撫申啟賢疏言校閱省



城營伍各弁多虛報弓力槍礮有全未中靶者

詔哈郎阿甫經往閱乃顛預卒事如此禡都統退出御前侍衛以二等侍衛在乾清門行走罰世爵半俸十二年既數遷至正藍旗蒙古都統復

賜紫禁城騎馬二十一年春山海關秦王島有夷舶署領侍衛內大臣馳往協防其秋再往既而英夷犯浙江海口陷鎮海授參贊大臣偕揚威將軍宗室奕經往剿夷釁之起以黃爵滋請禁鴉片煙而林則徐使粵勒繳疏陳勦撫兼施

宣宗手報該夷自外生成彼曲我直中外咸知朕不慮卿等孟浪而慮畏蕙於是兵端開矣夷卒不得志於粵遂由浙入江浙事之棘奕經留蘇州有司日以歌舞樂之葛雲飛王錫朋鄭國鴻死綏而裕謙亦殉始款於江甯厥後咸豐十年夷犯天津僧格林沁勝保先後禦之不利再款於京師兩役皆英倡法亦與焉又後光緒十年法夷內犯

朝旨戒所在勿先發臺灣罷雞籠不守幸挫於孫開華福建夷船索戰我輪舶尙連旋江中亟以請主者弗省遂並船廠胥毀於夷幸捷武兵船礮殪其酋孤拔迨馮子材大衄之鎮南關夷乃以款請中間俄夷乘



我多事東割吉林黑龍江西割伊犁邊界屬國琉球  
緬甸暹羅遞攘於諸夷朝鮮不絕如縷談者由是競  
於洋務矣大抵營購一切及使者番出規以自彊天  
下由是衰耗焉禦夷要領故未知所在而兵端實始  
道光時於是哈郎阿復奉

命回防山海關

賜裘一襲疏言吉林黑龍江滿兵防堵山海關者所領馬乾  
不敷飼養請照成例減半支給

俞之二十二年授領侍衛內大臣尋

命在

御前侍衛上行走調鑲紅旗漢軍都統連坐所屬鑄三級留  
任二十五年以病請致仕

命食侯爵全俸二十九年卒

賜祭葬並銀五百兩加太子少保銜諡曰剛恪子那銘襲授  
乾清門侍衛

全德姓瓜爾佳氏吉林人隸滿洲鑲黃旗乾隆中從  
征緬甸金川有功五十七年歷遷佐領尋擢防守尉  
任協領嘉慶二年隨吉林副都統賽冲阿勦川陝楚  
三省教匪明年春擊白號高均德於王家山敗之師  
次陝西洋縣安子溝賊夜襲我營舉火力戰斬級千



餘追黃號齊王氏姚之富至楚鄖西大軍圍攻賊潰  
獲賊目王如英等於三岔河齊王氏之富墜巖死殲  
賊甚夥其夏均德奔渠縣大神山與通江藍號冉文  
儁合大軍分道攻克之秋青號徐天德據達州境白  
號羅其清據巴州境結襄陽黃號樊人傑擾觀柴場  
等處我軍分攻之鏖戰四晝夜斬馘四千有奇四年  
追文儁至東會山梁賊乘夜回犯設伏以待既入大  
敗去並有功明年移師入楚勦藍號餘匪於七佛溝  
眾賊迎拒率所部與戰賊據山梁下撲突出諸軍前  
一槍斃二賊賊驚我軍乘之大敗賊眾

詔嘉之進攻林江鋪杜家坡兩岔河三戰三捷殲賊無算  
賜號噶爾薩巴圖魯六年擊敗文儁於隴州草白峪再敗之

楊溝加副都統銜尋卒子三和特恩保防禦富拉特  
恩保佐領富隆額驍騎校而與全德隨賽冲阿征教  
匪功名略等者曰明德

明德姓伊爾根覺羅氏吉林人隸滿洲正黃旗乾隆  
中嘗從平金川有功六十年歷遷至佐領嘉慶二年  
隨征川陝楚三省教匪師進陝西會藍號張漢潮走  
平利曾家壩擊敗之尋設伏黑虎廟斬級千並殪賊  
目張世虎其冬漢潮合黃號王廷詔竄漢中謀北遁



率勁兵馳高臺寺要之斬馘無算

賜號噶爾薩巴圖魯

賞花翎明年白號高均德自鐵鎖關竄川境躡擊多斬獲其秋均德據大神山與通江藍號冉文雋合擾及龍鳳坪我軍渡消水河攻之薄道嶺連矢斃賊數十賊靡我軍因乘之逐北至鑼鍋頂斬級五百擒張舉等二百餘人冬擊黃號樊人傑龍紹周於箕山殪賊六百餘偵文雋據麻壩寨夜疾走乘其不備燬賊巢已亦傷於石四年隨內大臣德楞泰入楚擊青號徐天德於竹山之紅坪進克店子埡明年藍號冉添元渡嘉

陵江分擾南部鹽亭西充縣境我軍自楚躡入川連克馬蹠岡黃茅嶺獲偽先鋒陳得俸並殪藍號賊目冉添恆進攻包家溝獲添元及偽總兵解其順等二百餘人白號張子聰據新店以騎兵由老鸛嘴疾擣其巢賊潰竄銅埡口進攻之陳斬偽元帥雷世旺其夏躡擊藍號賊目冉添士汪家坪曹家坪斬級三百擢協領藍號李炳據巴州陡坎子山梁先諸軍登戰尤力賊潰

詔獎焉六年春逐賊入陝敗之乾溝俘斬千計仍躡至野豬坪箭殪白號賊目高二殲其眾天德人傑潛渡漢江



要擊於鍾家坡敗之夏天德走紫陽東竄我軍躡擊不少縱賊窮蹙走仁河新灘爭渡船覆天德墜水死秋由陝入楚敗賊通城九道梁逆擊青號賊目李尙文逸自大禾田者獲之進攻紅茶園殲賊目吳添珍及其黨數十人明年擊賊蒲河敗之復由楚入川連攻柏林槽九盤寺馬鞍山多所斬獲其秋戰煙墩壩旣捷進搜餘匪於天池壩白牛池白河口捕斬甚夥軍事漸定凱旋尋擢墨爾根城副都統二十一年乞休二十四年卒子郭全道光六年以防禦隨征喀什噶爾城力戰殞焉

安福姓薩克達氏吉林人隸滿洲鑲藍旗乾隆五十五年由雲騎尉授侍衛尋遷二等嘉慶四年川陝楚三省教匪未靖吏部尙書魁倫署四川總督擢頭等侍衛隨往征之明年隨經略大臣額勒登保追擊黃號伍金柱於陝西之漢陰賊屯大小銅錢窖期提督楊遇春分道攻之賊據窖南山梁下撲我軍圍而與戰斬賊目龐洪勝獲其子有兒並楊大燕等越日白號楊開甲焚掠洋縣茅坪邵家溝勢張甚率所部趨亂石峽溝仍期遇春夾擊殪開甲斬獲二千餘而白號賊目高三馬五糾青號徐天德黃號王廷詔謀竄



湖北我軍由竹溪要之適賊聚棗樹嶺山梁力攻之賊東遁俘斬千計其冬高三馬五復自漢陰趨漢陽坪折竄五洋河遂出越嶺關截賊前擊之大敗去六年高三馬五竄白雄關攻掠民峒率步騎分路邀擊斬獲四百有奇夏勦藍號賊目冉學勝於隴州草白峪賊敗走躡擊於蕭家壩及紫陽俘馘三百有奇既而餘匪竄西鄉紅羊河偕協領全德率騎兵追殲之其秋還京在

乾清門行走九年充吐魯番領隊大臣明年加副都統銜調塔爾巴哈台領隊大臣尋授鑲白旗蒙古副都統遷圍場總管十五年

巡幸木蘭舉秋獮坐圍場牲畜稀少失察附近蒙古民人潛偷降三品頂戴尋又坐失察偷伐圍場樹木鐫三級留任二十年回京以頭等待衛在大門上行走明年復在

乾清門行走二十四年三遷正白旗滿洲副都統坐失

察關入

禁門者褫職留任明年充

御前侍衛授右翼前鋒統領追坐失察吐魯番濫支開墾地租銀罷道光二年



命赴馬蘭鎮察鞫盜伐樹木汎弁治如律疏陳量展青椿章  
程明年授鑲白旗護軍統領調鑲黃旗明年坐不能  
彈壓

隆宗門叩

閻之護軍罷職並褫

御前侍衛仍罰俸五年授

盛京副都統歷調正藍旗滿洲副都統六年逆回張格  
爾入卡滋擾

命統黑龍江官兵赴勦明年與大軍會洋阿爾巴特莊賊列  
沙岡我軍分三路進隨揚威將軍長齡由中路進擊

奪據沙岡賊潰其半竄回莊殲之殆盡進抵渾河賊  
夾岸相持我軍出不意徑渡擊之賊奔喀什噶爾城  
張格爾已前遁偕提督楊芳等圍克之

賞花翎尋偵賊據塔里克達巴罕偕楊芳分道進攻先諸軍  
力戰受槍傷

賜號譽勇巴圖魯擢察哈爾都統八年復充

御前侍衛其夏回疆平列四十功臣圖形

紫光閣

御製贊曰多年侍衛出鎮陪都命將勁旅萬里疾驅搜勦  
寇遇之負隅中槍出險良用嘉諸明年墮



欽差大臣長齡視師新疆秋歷調鑲黃旗護軍統領坐保送  
揀補守備技不中程鐫一級留任十四年以年老罷  
御前侍衛授右翼前鋒統領十六年坐考驗騎射未將文進  
士慶廉殘廢斥駮褫職仍罰俸十八年卒

詔給治喪銀三百兩照都統例議卹

賜祭葬如故事諡曰剛恪子二薩炳阿二等待衛兼公中佐  
領西朗阿侍衛

傳陞初名川陞姓郎佳氏吉林人隸滿洲正白旗乾  
隆五十二年洵任侍衛尋扈

駕秋獮坐事降藍翎侍衛五十七年從征廓爾喀有功復任

如故六十年

命在乾清門行走嘉慶四年川陝楚三省教匪未靖

命與侍衛春凝馳詣經略大臣額勒登保軍營協勦川匪其

冬白號解大川苟文明竄通江大軍躡擊至雞公梁  
分三路合擊額勒登保自當中路令與副都統銜格  
布舍以步騎分由左右仍設伏要之旣戰賊敗入伏  
益大潰逐北數十里俘獲甚夥明年擊白號張天倫  
於甯羌二即壩溝及五郎連敗之天倫竄雒南兩岔  
河我軍分道追擊賊恃眾反拒格布舍陷陳賊持矛  
刺之墜傳陞槍殪持矛賊援格布舍出賊數騎來追



悉殪之馬上我軍乘焉殲賊無算

詔嘉之超擢頭等侍衛

賜號呼嵩額巴圖魯其夏藍號賊目劉允恭擾洵陽大中溪設伏與戰陳斬允恭黃號龐洪勝伍金柱據手攀崖額勒登保督兵進擊率所部爲軍鋒次桐木溝遇賊鏖戰久之大軍至賊東走追敗之大小銅錢窖復躡之漢陰石板溝斬洪勝時白號賊目據漢陰七盤溝而分扼左右山梁因督所部下溝出不意直登左山梁高處且登且擊賊不支遂潰右山梁見之亦潰尋殪開甲於洋縣茅坪六年白號賊目高三馬五合黃

號王廷詔竄西鄉設伏舊州鋪左右賊出伏發大敗之俘斬甚夥被

優賚尋擊賊西鄉賊棄馬越山遁我軍亦棄馬逐之多所斬馘連偕提督楊遇春擊賊川陝交界之鞍子溝獲廷詔擊甯羌獲高三馬五並其孥累擢正黃旗蒙古副都統兼公中佐領

賜改今名二十一年以病乞休明年卒

努三姓瓜勒佳氏吉林人隸滿洲正黃旗初由藍翎侍衛累擢頭等侍衛乾隆十年

命在御前行走明年四川總督慶復討下瞻對土酋班滾



命赴慶復軍旣而慶復疏班滾已斃十二年張廣泗繼督四  
川疏班滾見在如郎

詔治慶復罪努三隨同具奏鐫所加級十四年授鑲白旗副  
都統遷正藍旗護軍統領十八年偕湖廣總督永常  
赴安西籌邊防明年留駐鄂爾坤軍營降準噶爾宰  
桑一都爾伯特台吉策凌闖入卡倫

命爲參贊大臣與散秩大臣薩喇勒會將軍成袞扎布分路  
查緝時準噶爾烏梁海宰桑赤倫據吹地偕貝勒青滾雜  
卜台吉班珠爾分兵往擒之所獲甚夥二十年

高宗以收服扎哈沁未將逃犯巴朗擒獲與護軍烏勒登遇

事推諉

命定北將軍班第定邊左副將軍阿睦爾撒納及參贊大臣  
策楞協理北路軍務侍郎兆惠查奏坐應斬監候

詔二人收服烏梁海扎哈沁有功免其治罪以閒散留軍自  
效尋授藍翎侍衛在嚮導章京上行走明年累擢頭等侍  
衛偕左都御史何國宗往伊犁測量度數並繪地圖  
二十二年坐送兵赴巴里坤至嘉峪關卽疏請回京  
降藍翎侍衛旋以招撫巴爾達穆特各鄂拓克人眾  
復累擢頭等侍衛明年撤兵至烏隆古聞哈薩克錫  
喇之得木齊達什扎卜等匿博爾托輝偕副都統順



德訥往勦並擒盜巴里坤馬之庫魯特宰桑摩羅等  
於拜塔克收服根敦扎卜達什扎卜丁壯二百餘以  
功授鑲藍旗護軍統領

命經理巴里坤屯田疏言自穆壘至烏魯木齊有昌吉羅克  
倫可耕地十六處令屯兵輪種

詔選內地綠營兵七千往屯尋添派三千又疏偵勦瑪哈沁  
於博羅托海收其馬匹

賜幣二十四年兆惠被遮於黑水隨定邊左副將軍富德往  
援至呼爾璊分兩翼進擊賊敗遁仍前邀之遂至兆  
惠營告援軍至復以駝馬迎兆惠餘眾與副都統鄂

博什爲殿回駐阿克蘇授騎都尉世職奉

命赴烏魯木齊經理哈薩克貿易沿途查勘屯田搜捕瑪哈  
沁賊眾疏言烏魯木齊見屯兵一千再留凱旋兵五千於  
特訥格爾昌吉羅克倫分地墾種明年穫糧卽運供  
伊犁口糧籽種

從之又疏擒瑪哈沁訥克依等尋

命兼管烏魯木齊屯田事明年凱旋

高宗御豐澤園張幄宴將軍兆惠富德以下努三與焉

賜銀幣署正黃旗滿洲副都統授右翼前鋒統領二十七年  
擢鑲藍旗蒙古都統兼上駟院卿



命在阿哥總諳達上行走累授領侍衛內大臣御前大臣

命紫禁城騎馬調正藍旗滿洲都統四十三年卒

命故袂大臣等奠茶酒

賜祭葬如故事諡曰恪靖子依什策楞襲世職

富永姓薩克達氏吉林人隸滿洲鑲藍旗父哲森保

副都統銜頭等侍衛乾隆五十七年從征廓爾喀中

槍傷卒

卹贈騎都尉世職富永亦從征廓爾喀攻取濟隴官寨復由

噶多普進攻東覺山梁克之亦中槍傷累功授侍衛

襲騎都尉世職五十八年

詔哲森保在軍受傷身故朕用憫惻其子富永亦於軍前受

傷可加恩授二等侍衛以示軫卹尋以創發回吉林調理

嘉慶五年起供職九年授護軍參領十五年遷前鋒

參領以從

幸木蘭善用烏槍擢頭等侍衛

命在乾清門行走坐進班曠誤降三等侍衛退出乾清門十

八年復

命在乾清門行走遷二等侍衛授伊犁領隊大臣以緝盜功

加副都統銜二十一年回京尋授正藍旗漢軍副都

統二十五年署正紅旗護軍統領調正白旗蒙古副



都統兼管虎槍處道光二年出為熊岳副都統四年  
護送

仁宗睿皇帝實錄

聖訓赴

盛京尊藏禮成

命議敘七年授鑲黃旗蒙古副都統十二年署正藍旗護軍  
統領以年老乞休

詔食全俸明年卒子四烏爾袞泰副護軍參領烏什杭阿委  
護軍參領霍隆阿侍衛音德布福建福州城守營副  
將孫常連襲騎都尉世職官二等侍衛

吉林通志卷一百七

人物志三十六

國朝二十一

薩克丹布

倭楞泰

安楚拉

金保

圖明阿

春升保

永海

德海

烏爾德善

阿勒罕保 額勒登額

穆克登保

和福

巴清德 圖欽

那桑阿

伊勒通阿

吉勒通阿 壽昌 烏凌額 德成額



託雲保

富春

托雲

薩克丹布姓鈕祜祿氏以吉林新滿洲隸正白旗乾隆四十九年隨尙書福康安征石峯堡逆回隸領侍衛內大臣海蘭察賊據底店山梁槍斃執旗賊目於馬上餘遂驚潰擢藍翎侍衛五十二年海蘭察以參贊大臣討臺灣林爽文仍從往賊據八卦山伏賊百餘山下竹圍中我前行僅二十人賊遽出截馳斬一賊於是爭乘之多所俘馘進攻中林斗六門並克

賜號伯奇圖巴圖魯事平擢侍衛圖形

紫光閣

命詞臣爲之贊曰率眾攻堅奮擒驍悍毀柵截途殺賊無算火燄騰山力窮鼠竄潰彼蟻封資爾勇幹嘉慶元年隨護軍統領德楞泰征湖南逆苗石柳鄧奪全壁嶺克廖貢坡馬鞍山並有功遷二等侍衛魚坡之麓名石隆柳鄧所巢寨落甚夥隨都統額勒登保乘夜深入賊眾以死禦卒不支陳斬柳鄧苗疆平遷頭等侍衛明年移征川陝楚三省教匪隨額勒登保擊賊蜈蚣山敗之進殲芭葉山賊歷戰紅土溪山嶺石柱嶺打子臺天花坪雞公嶺銅鼓包並捷斬獲甚夥而大金坪



松林懷抱窩山梁之戰陳擒賊林士偉等數十人斬  
百餘級尋追擊賊自爛泥渡竄圍子嶺及蓼葉村者  
殲賊五百有奇四年以病乞休十年

詔薩克丹布前在軍多立戰功茲聞病勢益增賞給副都統  
銜冀樂聞朕旨速愈其疾尋卒

賜祭葬如故事子格布舍累官甘肅甯夏將軍

倭楞泰姓赫舍里氏吉林人隸滿洲鑲藍旗嘉慶二  
年川陝楚三省教匪不靖隨副都統賽沖阿剿川匪  
明年授軍營委筆帖式四年藍號蕭占國張長庚等  
自閩中回趨營山大軍逆擊於黃土牆斬級四百餘

賊竄據譚家山先眾登山梁短兵接陳斬占國長庚  
殲賊八百獲賊目王家光等八百餘人白號冷天祿  
屯悅來場我軍乘勝自閒道冒雨襲攻之逐北至石  
頭堰殪天祿俘馘甚夥

賞藍翎尋隨參贊大臣額勒登保擊青號涂天德於修基壩  
賊竄鄧家山我軍三路圍剿多所斬獲六年襄陽賊  
首任懷志就擒累擢佐領二十一年遷協領道光三  
年任德州城守尉尋擢吉林副都統

賞換花翎明年疏陳舊務將熟悉採獲刨夫照舊規留山過  
冬令尋覓培養供官舊之額其挑賸者卽賞給刨夫



以資鼓勵五年疏陳雙城堡距阿勒楚喀百有十里  
距多歡九十里文移既增兵丁疲於步送請增設一  
站其牛馬草豆銀兩酌於南北三十八站內融支

詔並如議其冬以建造移駐京旗房屋劾佐領訥音登阿砍  
木遲延因條上砍木章程以示懲勸從之六年疏請  
撥甯古塔防禦四員於拉林並卽拉林領催以下挑  
選關防辦事無品級筆帖式二員

詔如所請尋坐失察所屬報卡外流民戶口不實罰俸一年  
秋逆回張格爾滋擾

命爲領隊大臣率兵會剿明年春戰洋阿爾巴特旣捷進攻

沙布都爾莊逐北數十里越日會攻阿瓦巴特回莊  
賊阻岡爲陳大軍分兩翼進賊佯退復前卒力擊敗  
之陳獲二千有奇斬級二萬殪賊目阿瓦子邁瑪底  
那爾巴特阿渾二人乘勝攻喀什噶爾復其城張格  
爾先遁斬賊目託和卓等十餘人八年凱旋回任明  
年疏言雙城堡移駐京旗地畝較少請於原定移駐  
京旗三千戶改爲千戶以所餘二千戶地畝增給之  
每戶地可十五晌至本地旗丁三千戶授田亦少每  
戶酌增地八晌三畝五分

詔如議尋疏吉林蓐務疲憊請將減票歸公之票並出山票



內短放之票自道光八年始暫免抽收銀兩以蘇丁力

俞之十五年坐爲佐領博卿阿訐受變賣戡頭獲價銀四百兩禡戍伊犁二十年用額魯特愛曼所屬界內塔錫圖畢開墾地畝功竣在事有力

賜環尋卒子二貴昌協領貴明銀庫主事

安楚拉姓庫雅拉彥札氏吉林人隸滿洲正黃旗嘉慶二年隨副都統賽冲阿勦教匪於四川四年擊賊黃土牆追之譚家山陳斬藍號蕭占國張長庚事具倭楞泰傳尋乘勝冒雨自閒道擊白號冷天祿於悅

來場逐北至廣安州之城頭堰殪天祿俘馘甚眾

賞藍翎其夏隨參贊大臣額勒登保攻白號張子聰於雲陽縣之蒲家山克之子聰復糾賊目蕭焜與黃號樊人傑龔建等合大軍連敗之寒水壩楊家山譚家壩多所斬獲並有功而身亦被石傷累擢佐領十八年隨副都統色爾袞李文成於滑縣大軍旣合圍文成竄輝縣司寨據焉以圖牽綴復分兵圍之文成窮蹙遂死餘賊悉就殲擒以功

賞換花翎尋遷協領道光六年隨揚威將軍長齡討逆回張格爾戰阿瓦巴特回莊進復喀什噶爾城事具倭楞



泰傳

賞副都統銜尋授甯夏副都統未幾以傷病乞休  
詔食全俸終其身十年卒

金保姓庚克勒氏吉林人隸滿洲鑲黃旗嘉慶二年  
隨副都統賽沖阿征陝西教匪時藍號張漢潮走平  
利之會家壩我軍於東北山後要之多所斬獲黃號  
齊王氏姚之富竄川境追擊之黑虎廟箭殪賊目張  
世虎賊眾狂奔繖子坪周家壩躡擊連敗之其冬齊  
王氏之富竄據陝境羅村壩官軍分路進擊金保身  
先陷陳因大捷餘賊走黃官嶺將渡漢江大軍仍分

路夾擊殲賊踰千

賞藍翎明年駐營川陝邊界禦賊數有斬獲四年藍號蕭占  
國張長庚自閩州折擾營山逆擊於黃土牆譚家山  
陳斬占國長庚殲賊六千乘勝攻白號冷天祿於岳  
池天祿敗走廣安州追及之俘斬無算殪天祿

賜號伊勒達穆巴圖魯六年白號高三馬五竄陝之鐵鎖關

擊獲之明年白號苟文明自平安寨折竄秦嶺追敗  
之福安寨斬偽先鋒苟文清俘馘百數十文明竄龔  
家灣躡獲逆屬秋文明就擒花石崖累擢二等侍衛  
尋剿餘匪於鼇鍋子山殪賊目張芳吳廷召等八年



凱旋尋授前鋒參領十八年隨直隸總督溫承惠討滑縣教匪自輝縣進攻道口賊方造橋西渡擊之毀其橋大破賊眾冬抵滑縣擊敗桃源援賊掘地道實以火藥藥發城裂拔之加副都統銜陝之南山木廠停工役者乏食遂倡亂隨提督楊遇春剿之敗賊三元壩斬級百餘賊竄黃官嶺將入川率騎兵要擊逐北至階州俘斬千四百有奇二十一年授伊犁領隊大臣二十五年

詔還授鑲黃旗漢軍副都統調鑲藍旗蒙古副都統道光二年署鑲白旗護軍統領明年以病乞休

詔食全俸終其身九年卒

圖明阿姓杭阿塔氏隸蒙古正黃旗世居吉林嘉慶二年隨副都統賽沖阿征陝西教匪時黃號王廷詔合藍號張漢潮竄平利之曾家壩我軍襲之而先伏峽口以待賊驚入伏俘馘甚夥其冬自鐵鎖關躡賊至羅村壩擊敗之餘賊由二郎壩折竄漢中我軍躡而剿焉殲賊盈千明年擊賊洋縣王家山獲劉有才等二百餘人白號高均德竄川境躡擊之數有斬獲連克張家寨石橋河斬級二百以功累官防禦再遷至協領道光十一年擢西安副都統明年疏言西安



滿洲營出征回疆無著駝隻請照甘肅採買駝隻價銀每隻賠銀二十兩分二年於兵餉內扣還

詔分八年以示體卹十三年與將軍桓格合陳籌議買補倒斃馬匹章程略言西安滿洲兵月給餉銀並米折銀人三兩四錢又津貼草豆折價銀人約六七錢請每月人存銀三錢計一年各存銀三兩六錢以備隨時買補倒斃馬匹之需年終覈計自賠補馬價購買草豆外所餘仍分給各兵庶馬政兵力兩有裨益

詔如所議行明年卒子慶玉驍騎校

春升保姓努葉勒氏吉林人隸滿洲鑲黃旗嘉慶二

年隨副都統賽沖阿剿陝西教匪冬賊自黃官嶺偷渡漢江我軍馳擊斬級千餘餘賊潰竄躡之復多斬獲

賞藍翎明年夏白號高均德自鐵鎖關走川境大軍追擊數有俘馘賊奔渠縣大神山與藍號冉文儔合官軍三路攻克之秋青號徐天德白號羅其清結黃號樊人傑擾營山縣之插旗山鳳凰寺進擊破之獲張貴等二百餘人斬千餘級賊竄箕山官軍追敗之又敗之蓼家碾斬級六百獲賊目郭彥榜等三十餘人五年戰江油新店子及達州土主河並捷明年躡白號高



二入陝擊之山陽縣乾溝賽沖阿箭中賊肩諸賊忿持長矛競進春升保力禦卻之仍乘勝追擊獲賊目龔如一僞元帥閻慎珍而身亦被創累擢防禦

賞換花翎再遷至協領兼公中佐領二十三年擢齊齊哈爾副都統道光二年疏言齊齊哈爾水災請將嘉慶二十五年被災借給接濟銀兩緩俟道光三年秋收後起扣以紓丁力

俞之先是黑龍江將軍奕顥等疏請於齊齊哈爾八旗甲兵內挑撥四百五十名歸火器營管轄

宣宗命詳察復奏疏言齊齊哈爾八旗額設甲兵二千一百七十名春秋演放烏槍於八旗挑撥操練事畢仍歸各旗當差若遽歸火器營管轄遇他差務不免顧此失彼謂宜仍遵成規認真訓練於騎射外閒習烏槍以資簡閱

宣宗是之八年坐前黑龍江將軍祿成派兵不公及以私馬交站餵養變價近與同城未能據實奏劾降三級調用九年卒子台費音圖佐領

永海姓瓜爾佳氏吉林人隸滿洲正紅旗嘉慶二年川陝楚三省教匪未靖隨副都統賽沖阿赴剿會藍號張漢潮竄平利縣境我軍旣連敗之又敗黃號齊



王氏姚之富於甯羌州明年破白號高均德於洋縣及之富齊王氏竄死鄖西並有功五年隨參贊大臣德楞泰入蜀至梓潼縣馬蹄岡破藍號冉天元賊眾獲天元並偽總兵鮮其順

賞藍翎七年追擊黃號樊人傑於竹山縣蹙之平口河腦人傑墜水死

賞換花翎累遷伯都訥及阿勒楚喀防禦十年擢伊通赫爾蘇佐領十八年河南教匪李文成倡亂陷滑縣隨副都統德英阿率吉林兵禦之衛輝數戰皆捷文成旋竄據輝縣之司寨大軍攻拔之而吉林兵先登文成

死

賜號幹勇巴圖魯尋偕提督銜總兵楊芳追剿陝西南山以木廠停工倡亂之匪於沔縣疾馳至剪子河扼其入川之路與副都統達斯呼勒岱遊擊萬彪分步騎夾擊斬級五百餘逐北至塘子口陳斬賊目吳某餘多解散明年賊渠龔貴就擒遷拉林協領道光三年擢伯都訥副都統坐前於拉林移用庫銀及所屬浮報義倉工程罷子庚音阿勒楚喀佐領

德海姓富察氏阿勒楚喀人隸滿洲鑲黃旗嘉慶四年調赴四川隨經略大臣額勒登保剿教匪以滅藍



號張漢潮功

賞藍翎尋授防禦十八年河南教匪李文成陷滑縣官軍圍之文成竄據輝縣之司寨隨總兵楊芳攻拔之文成死功多

賜號藝勇巴圖魯從克滑縣旋調赴陝西剿南山餘匪事平累擢三姓協領道光四年調雙城堡協領坐前於三姓增給兵丁鹽菜銀兩革職留任尋擢阿勒楚喀副都統明年調黑龍江副都統六年逆回張格爾倡亂命與參贊大臣武隆阿統滿兵往會大軍協剿師至阿爾巴特莊賊憑沙岡以拒官軍分三路而德海與武隆阿

攻其右大敗之斬級盈萬獲三千有奇他軍實無算師進沙布都爾莊賊眾十餘萬臨渠而陳冒險持短兵越渠搏戰且戰且進逼渾水河賊梟水遁逐北三十餘里俘馘無算乘勝進喀什噶爾張格爾先遁以所部克漢城據北面與諸軍圍攻復其城十年以病乞休道卒於莫爾根城功未及敘也子富森協領烏爾德善姓甯古塔氏吉林人隸滿洲鑲藍旗嘉慶初隨征川陝楚三省教匪戰比有功

賜銀幣十一年隨參贊大臣德楞泰戰山西以功累擢阿勒楚喀防禦調三姓二十一年擢吉林正藍旗佐領調



三姓鑲黃旗二十三年

駕幸盛京較射中靶被

賜道光六年隨揚威將軍長齡討逆回張格爾復喀什噶爾城有功

賜銀幣明年遷本旗協領尋調三姓十八年擢甯古塔副都統坐吉林將軍祥康攤扣官兵俸餉資駐京人員未嘗阻止鑄四級調用

詔革職留任二十二年

駕幸木蘭以演圍中靶者四

賜銀幣復於巴彥西諾圍場射鹿獲之

賞戴花翎二十七年致仕

詔食全俸終其身咸豐三年卒子二色綳額驍騎校罕章阿侍衛

阿勒罕保姓鈕祜祿氏吉林人隸滿洲正白旗嘉慶二年隨副都統賽冲阿征川陝楚三省教匪戰竹葉關克露風坪禦賊五郎廟並有功明年擊賊黃壩驛進攻東家坪又敗賊三岔河尋自秦嶺繞出華州邀賊賊大潰克華陽壩進大神山遇賊敗之賊竄風銅鋪躡擊殆盡以功

賞藍翎累擢侍衛十八年直隸長垣教匪擾及豫東



命直隸總督溫承惠爲欽差大臣勦之疏請阿勒罕保隨往  
尋以逆匪擅入

禁城

命暫留京師協捕事平遷二等侍衛赴軍旣至新寨率精銳  
直搗賊巢多所斬獲冬進攻道口賊出拒而桃源援  
賊復至分兵擊之並潰擢頭等侍衛在

乾清門行走進攻滑縣會諸軍拔之獲賊目徐安國俘  
斬萬數事平加副都統銜坐回京携帶幼孩鐫四級  
調用

詔改留任仍在乾清門行走二十年授鑲藍旗蒙古副都統

明年

駕幸圓明園途有逸馬驚出

御前侍衛職在扈

蹕未卽前截坐褫職

詔降頭等侍衛在大門上行走俄復在

乾清門行走加副都統銜充伊犁領隊大臣二十五年  
授正藍旗蒙古副都統道光二年充十五善射六年  
逆回張格爾倡亂以領隊大臣率黑龍江官兵赴軍  
勦之明年遇賊洋阿爾巴特官軍分三路擊之殲賊  
幾盡大軍戰沙布都爾莊以騎兵張兩翼涉渠抄擊



賊驚潰陳斬賊目色提巴爾弟俘馘無算戰阿瓦巴  
特回莊賊憑沙岡以拒又以騎兵由岡右襲之賊敗  
斬賊目二殲賊三萬

賜號壯勇巴圖魯喀什噶爾城既復張格爾先遁而賊目愛  
瑪爾阿里玉努斯等猶據和闐揚威將軍長齡檄往  
勦之取道雜古牙爾遇賊昆拉滿分兵夾擊大敗之  
和闐平復授伊犁領隊大臣長齡疏留冬偵知張格  
爾奔喀爾鐵蓋山率軍自阿爾圖什躡之賊棄馬登  
山大軍窮追弗舍獲之山巔明年春齎捷奏馳報

京師

命在御前行走授正黃旗護軍統領圖形

紫光閣

御製贊曰索倫勁旅特命將之驍捷前鋒四城星馳火槍善  
戰躡蹤窮追超出賊背國之熊羆九年調鑲藍旗滿洲副  
都統以較射失儀革

御前侍衛仍在

乾清門行走秋扈

幸盛京坐有馬闌入布城鐫一級留任明年較射

宣宗臨閱中六矢仍

命在御前行走秋安集延回匪不靖隨大學士長齡赴新疆



察辦十一年回京坐失察馬甲呢莽阿教習鐫三級  
留任十四年以年老退出

御前侍衛尋乞休未幾卒子崇連護軍藍翎長而前阿勒罕  
保有額勒登額亦吉林人姓舒穆魯氏隸滿洲正黃  
旗乾隆二十三年以侍衛隨副將軍富德援將軍兆  
惠於葉爾羌敗霍集占功最霍集占竄拔達克山索  
之其汗素勒坦沙因函首以獻

賜號噶畢雅圖巴圖魯游擢武等侍衛鑲黃旗蒙古副都統  
授騎都尉世職兼一雲騎尉圖形

紫光閣

御製贊曰軍門統事諸務勤宣亦能力戰突將無前入拔達  
山索逆回馘曉諭諸方是其偉績三十二年以參贊大臣  
偕將軍明瑞征緬甸分道進明瑞殉木果木坐逼留  
見法

穆克登保姓富察氏吉林人隸滿洲正白旗父靈泰  
烏魯木齊領隊大臣嘉慶十一年

駕幸木蘭穆克登保從會陝西甯陝鎮新兵叛

欽差大臣德楞泰疏請簡隨圍弁兵赴陝西備調遣因隨護  
軍統領溫春進至好古堆我軍分三路環賊攻之賊  
敗躡以進又賊三千餘來戰勢頗張力擊之賊目蒲



大芳中創遁逐北至拐里賊分屯四山官軍扼方柴  
關擒僞先鋒彭貴賊益氣奪因招之大芳降縛獻陳  
達順陳先倫向貴三首逆磔軍前以功授親軍藍翎  
長道光五年累擢護軍參領十年逆回博巴克糾浩  
罕入卡圍喀什噶爾英吉沙爾城大學士長齡以

欽差大臣視師穆克登保隨往既歲事以功擢司鑰長尋以  
副將揀發湖南補常德城守協副將十七年擢廣東  
南韶連鎮總兵調陝西西甯鎮總兵二十年卒  
和福姓庫雅拉亨奇勒氏吉林人隸滿洲正白旗嘉  
慶十三年從

幸木蘭行秋獮射生多所獲

賞戴花翎十六年累擢協領又二年河南教匪陷滑縣偕副  
都統德英阿赴軍協勦時賊首李文成自滑縣竄據輝  
縣司寨官軍設伏白土岡山劫誘與戰賊恃眾直前  
既入伏大軍夾擊斬馘甚眾賊敗歸寨不復出進圍  
之舉火且焚且攻殪賊目劉國明文成死凱旋加副  
都統銜二十一年擢

盛京副都統明年與將軍富俊疏言復州等處被災旗  
民應領續賑米石各倉缺額不敷支放請以銀米兼  
放



俞之二十三年疏言大凌河馬廠試墾地畝磽薄居多若照旗租之例升科勢必拮据請照養息牧試墾地畝例每畝徵租銀四分以紓丁力如所請行秋

駕幸盛京坐馬關橋瓦子峪

蹕路未能督率修整降金州城守尉尋又坐副都統任內通判常山丁憂未令回旗仍奏署

興京通判鐫三級調用富俊疏留

詔改調用爲留任未幾遷協領擢伯都訥副都統尋調甯古塔副都統道光十年疏言舊務請將減票歸公之票照吉林例九年爲始暫免抽收銀兩蘇刨夫之力如

所請行明年調甯夏副都統十二年調熊岳副都統其冬疏劾蓋州防守禦焦成及蓋平縣知縣張攀桂等查辦夷船不力降黜有差而已亦坐失察呈吏議明年以病乞休

允之十九年卒子四文恆防禦開明阿喀什噶爾辦事大臣杜恆協翎多恆佐領孫四承惠佐領承湛筆帖式承英襲雲騎尉承緒領催

巴清德姓額扎特氏吉林人隸滿洲正黃旗嘉慶十八年隨副都統德英阿勦教匪李文成於河南時文成陷滑縣復竄據輝縣司寨



欽差大臣那彥成檄德英阿率吉林騎兵自新鄉會攻旣克  
司寨文成死進克滑縣獲賊目牛亮臣巴清德並有  
功

賞藍翎尋擢藍翎侍衛道光元年遷侍衛在

乾清門行走充十五善射四年造辦處玻璃庫災救之  
甚力

賜物六年授公中佐領尋擢二等侍衛奉

命隨山東巡撫武隆阿剿匪臺灣事平復隨赴回疆明年逆  
回張格爾旣斃於沙布都爾莊復糾眾十數萬據阿  
瓦巴特回莊官軍分三路進與侍衛哈郎阿繞莊後

襲之賊大潰俘馘甚夥逐北至洋達瑪河濱河回莊  
逆匪搜剿殆盡

賜號襄勇巴圖魯進復喀什噶爾城張格爾先遁獲其孥及  
安集延賊目推立汗擢頭等侍衛圖形

紫光閣

御製贊曰親簡勇壯命赴軍營長軀赤面弓馬純精兼嫺火  
器屢立功名御前特擢望汝干城十年回疆復擾

命偕侍衛舒凌阿赴軍事定留辦屯田十二年隨

欽差大臣瑚松額剿匪臺灣嘉義縣首逆尋就獲回京十五  
年授鑲白旗蒙古副都統明年充國什哈諳達授鑲



藍旗護軍統領

圓明園災以力救加二級歷調鑲黃旗滿洲副都統正藍旗正白旗護軍統領管理健銳營神機營火器營事務二十一年英夷不靖海疆戒嚴

命偕御前大臣科爾沁郡王僧格林沁工部尚書賽尙阿赴天津防堵明年夷擾江蘇復

命率蒙古騎兵駐新城秋還京坐火藥局災失察被議二十四年署右翼前鋒統領明年坐兩翼兵槍箭生疎鐫二級留任夏

紫禁城災救甚力加一級二十六年卽眞尋轉左翼前

鋒統領三十年擢鑲黃旗蒙古都統署正藍旗滿洲都統咸豐元年署行營正黃旗領侍衛內大臣粵匪洪秀全等倡亂

命偕

欽差大臣大學士賽尙阿馳往辦賊夏疏陳汰兵勇明紀律購閒謀散賊黨斷接濟行團練各條得

旨所籌甚合機宜

賞穿黃馬褂時賊據紫荆山後負豬仔峽雙髻山之險而前以新墟爲門戶秋與提督向榮由中路擣豬仔峽克之進攻雙髻山率勁卒攀巖上賊不能禦遂潰逐北



三十餘里多所斬馘被

優賚大軍攻克風門坳隘口遂圍新墟而巴清德與向榮趨  
古林社復緣河以進賊傾巢出戰擊之卻賊因分據  
山梁仰攻之斬三十餘級殪賊目一賊自焚其巢由  
藤縣和平墟逸去尋陷永安州

命摘去頂翎復以賽尙阿劾其頓兵遷延

詔褫職留營自效大軍攻永安與提督劉長清進自北路燬  
龍眼潭馬背嶺賊巢俄卒於軍

詔復都統

賜銀三百兩治喪

賜祭葬

子諡果毅方疾已劇時時橫刀起大呼殺賊及革有茗盃覆  
以紙兩手牢握之笑曰我擒洪逆矣子二倭什洪額  
侍衛倭興額二品廕生粵逆起金田塞其涓涓一良  
吏事耳不肖者尸焉遂致滄海橫流竭天下力僅乃  
砥之而所戕生靈百千萬計矣人有恆言曰官逼民  
反夫民何樂而反官州縣暨有進退州縣權者其念  
哉而嘗與巴清德同隸

欽差大臣那彥成轉戰河南山西均有功者曰圖欽姓關氏  
亦吉林人隸滿洲正紅旗嘉慶二十三年以襲雲騎



尉世職歷防禦佐領道光九年擢琿春協領坐開公倉放糧未俟部文奪俸咸豐三年擢三姓副都統九年卒子四德祥佐領德海護軍校德昌協領德壽驍騎校孫三善福前鋒校明安頭等侍衛明林侍衛那桑阿姓鈕祜祿氏吉林人隸滿洲正白旗嘉慶二十一年以藍翎侍衛在

大門上行走較射中五矢授侍衛二十五年擢二等待衛在

乾清門行走道光元年擢頭等侍衛六年逆回張格爾犯順揚威將軍長齡檄調伊犁兵赴援於是伊犁領

隊大臣皆出

宣宗簡侍衛三人爲領隊大臣馳赴伊犁那桑阿與焉長齡疏調從征明年戰洋阿爾巴特我軍分三路率健銳火器二營兵爲右翼賊自沙岡下壓擊之殪賊數百仍還據沙岡我軍冒鋒刃疾進賊大潰逐北三十餘里復躡擊至排子巴特多所斬馘獲賊目五邁曼底阿渾尤張格爾所親任藏有糾結賊黨書長齡上其功被

優賚進復喀什噶爾城加副都統銜授英吉沙爾領隊大臣賞戴花翎明年率步騎八千會長齡於阿爾圖什追剿張格



爾獲之喀爾鐵蓋山回疆平那桑阿以英吉沙爾地衝要雖有參贊經理而專城之責在領隊大臣既不識文字懼難勝任請

欽差大臣那彥成代陳改烏什幫辦大臣尋  
詔還京

命仍在乾清門行走十二年授鑲黃旗蒙古副都統歷伊犁及庫爾喀拉烏蘇領隊大臣復調伊犁十七年還京二十二年從獵圍河  
賞穿黃馬褂其夏英夷擾江蘇  
命工部尚書賽尙阿爲

欽差大臣督辦天津海防復以蒙古馬隊必得通曉語言者爲之率

命那桑阿偕往言事許並列銜仍  
賜衣二襲解嚴回京二十六年  
詔年逾六旬但管旗務毋庸在乾清門行走明年病卒子雙喜雲麾使公中佐領

伊勒通阿姓伊爾根覺羅氏吉林人隸滿洲鑲藍旗  
嘉慶十八年從征河南教匪李文成有功任防禦三十二年從

幸木蘭秋獮較射中矢多及行圍獲麇鹿



賜銀幣尋擢佐領道光四年擢阿勒楚喀協領六年隨揚威將軍長齡討逆回張格爾戰洋阿爾巴特我軍分三路參贊大臣楊遇春居左武隆阿居右伊勒通阿與副都統吉勒通阿隨長齡進中路而三路之軍仍各張兩翼破賊二萬餘逐北數十里至排子巴特再擊之斬級甚夥獲賊目邁曼底阿渾等

賜號沙罕巴圖魯進戰沙布都爾回莊仍分三路長齡等督步軍居中先嘗賊吉勒通阿以騎兵繼之而伊勒通阿與武隆阿分左右橫貫賊陳賊亂遂大潰躡逼至渾水河殲之殆盡遂由阿瓦巴特長驅喀什噶爾城

張格爾先遁城復獲其孥及安集延大酋推立汗薩木汗等

賞戴花翎其冬張格爾復糾布魯特賊眾自開齊山趨阿爾圖什回莊黑帽回遮截之乃退我軍追及於喀爾鐵蓋山借吉勒通阿以騎兵繞登山後與諸軍夾擊獲焉加副都統銜圖形

紫光閣

御製贊曰踴躍用兵河南滑縣茲統三軍獨當一面出陳先驅披堅督戰卡外山前臨機應變擢甯夏副都統護理將軍尋以回疆復擾隨長齡出關會事平回任明年調



甯古塔副都統十八年親老乞終養服闋起授正藍旗蒙古副都統改三姓副都統坐扣兵餉資住京官革職留任咸豐二年粵匪擾湖北率兵赴河南信陽州隨

欽差大臣琦善禦賊尋援江南戰比有功明年卒於軍

賜祭葬如故事蔭一子六品官子二花尙阿佐領祥玉藍翎侍衛以孫蔭哩哈承蔭吉勒通阿官副都統

賜號薩奇克起巴圖魯與剛安巴圖魯協領壽昌博啟巴圖魯佐領烏凌額蘇彰阿巴圖魯佐領德成額並吉林人以同疆功圖形

紫光閣事並未詳

託雲保姓額哲特氏吉林人隸滿洲正黃旗嘉慶十八年從征河南教匪以功授藍翎長道光七年回疆平隨

欽差大臣那彥成往辦善後事宜歷擢護軍參領充虎槍長及諳達三十年擢頭等侍衛在

乾清門行走充壓馬大臣授上駟院卿咸豐元年擢正紅旗漢軍副都統明年

文宗自

慕陵旋



蹕中途乘馬蹶坐平日騎壓不慎被吏議三年粵逆洪秀全等陷江南會城奉

命率吉林兵二千赴大軍剿之賊擾河南往援道出延津縣所部攘民間牲畜傷人爲

欽差大臣直隸總督訥爾經額所劾鐫三級調用仍留營秋賊渡河北攻懷慶府甚急我援軍營丹河鋪迤南季村以騎兵與會戰於城下焚環城賊壘多所斬馘賊竄濟源縣而設伏風門山口前軍追賊入伏督所部馳救槍殪賊目賊驚靡擒斬大半別賊闖入山西陷平陽府據之

欽差大臣都統勝保劾追截不力

命摘頂翎賊尋竄直隸據靜海縣及獨流鎮隨勝保自深州疾馳至獨流鎮連戰皆勝

賞還頂翎大軍營葡萄窪逼攻獨流鎮靜海賊來援分兵擊之斬級五百有奇賊勢益蹙會以病回旗四年秋病痊仍赴勝保軍冬授正藍旗蒙古副都統於是賊竄山東陷高唐州據之勝保移師圍攻數月未下明年春勝保以老軍被逮賊尋自高唐竄據馮官屯隨參贊大臣科爾沁親王僧格林沁破之俘賊渠李開芳賞換花翎調正紅旗蒙古副都統還京



命在御前侍衛上行走授奉宸院卿冬擢甯夏將軍先是道光二十二年甯夏兵每歲添演秋圍將軍與副都統番率至賀蘭山肄馬上烏槍及諸技著爲令西安甯夏官兵一律添演秋圍借副都統疏言甯夏駐防官行圍錢糧官借官償兵借兵償視綏遠城以卡倫房租作公項給發者不同見餉項不足兵力亦艱若復加行圍給項不特不能清償且累上加累請俟協餉充裕照例演習

詔如所請八年以病乞休  
允之明年卒

富春姓韓氏隸蒙古鑲紅旗吉林駐防道光七年從攻回疆喀什噶爾城先登

賞藍翎十四年游擢協領二十一年擢黑龍江副都統時英夷肆擾以所部防守錦州之高橋被

優賚二十四年傳習邪教海康之女於黑龍江配所潛逃坐革職留任尋以非副都統所管轄

詔免議明年入

覲

賞換花翎二十六年以病請罷咸豐二年粵逆陷湖北武昌命吉林將軍調兵往防楚豫之交時富春病痊請赴軍自效



詔如所請明年賊陷江南會城督兵於六合縣境禦賊數有功授甯古塔副都統仍留軍六年賊陷揚州我軍進攻有賊來自西北甚眾將襲我營偕總管西昌阿分道禦之戰七里店既捷合軍躡擊至黃家莊獲賊目五長髮賊六十有奇斬千餘級

賞頭品頂戴大軍復揚州以所部伏截竄賊殲斃無算

賜號伊伯德恩巴圖魯八年春江甯賊渡江援江浦合烏江據賊營石積橋江浦賊千餘出應大軍擊援賊敗之平其壘獨率所部禦城賊戰於濠邊斬百餘級和州復烏江芝蔴河等賊將遁分路要擊俘馘及溺江以

斃者甚夥其夏皖賊下援江甯趨江浦糾捻逆會大劉莊與大軍分路攻之會大雨如注乘勢猛進賊不支狂奔自相踐蹋死者甚眾秋戰江浦被創養傷邵伯鎮

欽差大臣德興阿以

聞

詔富春創不甚重輒自離營以年邁且著有勞績免于治罪因罷職九年卒於家富春雖終斥要猶經戰陳非但具官資如托雲也

托雲姓彥扎氏吉林人隸滿洲正黃旗道光二十六年



年以藍翎侍衛在

乾清門行走從

謁

東陵授侍衛

賞穿黃馬褂咸豐三年洵擢頭等侍衛四年

文宗閱馬射中六矢

命在御前侍衛上行走授正藍旗蒙古副都統八年署正白

旗護軍統領尋

命進

圓明園班管理

御槍處事務署鑲藍旗護軍統領

文宗閱八旗槍操以平日悉心訓練被

獎卽真歷署鑲藍旗漢軍鑲紅旗滿洲及漢軍各副都統同

治元年授正藍旗護軍統領三年調正白旗

命兼管火器營事務明年擢右翼前鋒統領調正紅旗滿洲

副都統丁母憂尋以神機營操務有勞被

獎十年歷充左翼監督授鑾儀衛鑾儀使署正白旗蒙古副

都統光緒元年神機營疏保出力

賞都統銜歷署正紅旗正藍旗滿洲副都統授左翼前鋒

統領



命紫禁城騎馬擢正紅旗蒙古都統坐薦舉營總文忠護  
軍校國春卓異御史鄧慶麟言文忠貪婪狀得實應  
鐫二級調用

詔改降四級留任明年以病乞休尋卒  
賜祭葬如例子阿克占工部郎中

宗國八旗餘姓以平日恭小臨縣  
命天宗五王  
宗國八旗餘姓以平日恭小臨縣

吉林通志卷一百八

人物志三十七

國朝二十二

關保

安圖

貴陞

德英

伊興額

金順

花哩雅春

德昌

德玉

關保姓烏扎拉氏吉林人隸滿洲正黃旗道光六年  
及十年再從征回疆有功二十三年歷擢三姓佐領  
咸豐三年隨侍郎恩華勦粵逆戰河南懷慶府山西



平陽府並捷還屯保定

欽差大臣勝保檄充營總率所部勦深州靜海餘賊還攻獨流鎮功多擢協領

賞戴花翎明年隨參贊大臣科爾沁郡王僧格林沁自獨流鎮躡賊至阜城三里莊賊首林鳳翔反戰額中槍丸裹創進賊不支逐北四十餘里

賜號年昌阿巴圖魯五年調赴安徽會大軍克廬州加二品銜明年隨江南提督和春勦五河踞賊以所部分伏道左賊出夾擊之賊驚竄多所斬馘尋偕副都統麟端以騎兵薄賊壘賊三千餘繞襲我後先諸軍馳陷其

陳賊卻黃衣賊目三橫刀立馬陳後復麾之進所部槍殪其二賊乃大潰俘斬千餘夏隨僧格林沁蹙賊山東高唐州之馬官屯殲焉已調湖北尋調河南又調安徽當是時吉林馬隊名天下東南水陸軍恃以相輔故諸帥銳欲得之故事功上克城騎所長野戰故以十日閒奔命三省勞則甚矣關保蓋猶之偏裨既赴和春軍道敗邳州援賊解壽州圍毀賊壘二尋擊賊潁上縣高橋及八里河十八里鋪小青龍尾小河沿五戰皆勝秋移隸河南巡撫英桂敗賊馬村橋進亳州雙溝遇賊姬橋殲之又連敗賊三丈口舊縣



集安徽巡撫福濟疏調赴蒙城英桂疏請留豫

詔兩撫和衷商推俾先所急時方率軍趨懷遠聞捻逆逼徐州越境助擊勝焉漕運總督邵燦又疏請暫留徐州詔如所請七年偕總兵史榮椿馳永城岳家集掩取捻逆李月月先遁焚其巢尋以病歸明年天津警

詔起之冬

命率吉林黑龍江察哈爾兵千八百赴太僕寺卿袁甲三徐州軍九年春與宿濰兩營騎兵分路攻滄北捻逆曹金斗金斗據圩死守圍而臨以火器賊眾亂破之乘勝疾攻捻逆張寶全復破之而懷遠逆首張樂行以

步騎萬餘陷泗州踞草溝民寨北築一圩爲犄角合民團進奪圩外礮臺燬其圩寨賊出不意大驚則開東南門分竄自相踐蹋死濠間纍纍其逸出者躡擊之尸積數十里沱水爲不流至五河雙渡口餘賊方奪船爭渡我騎然槍排擊復殪大半斬馘外獲長髮賊渠張起等三百有奇及軍實甚夥

詔以副都統記名時徐州鎮總兵傅振邦督辦三省勦匪事宜

命爲幫辦攻逆首任乾於畢圩未至適捻逆張天福敗鳧滄水擊斬之師進任乾突走不得反入圩乘勢壓攻圩



民內應斬乾殲其黨千餘無脫者夏

文宗罷副都統伊精阿河南防軍

命接統之督辦河南勦匪事宜仍爲傅振邦幫辦尋授黑龍江副都統秋捻逆犯亳州遣將敗之時逆首孫葵心聚黨於永城分起齊出

詔江蘇豐碭等處賊勢將蔓延未可更令闌入山東邊境宜督參將承惠等截賊西路逼之歸巢旣而葵心分擾商邱柘城圍睢州且至杞縣封戒嚴

詔赴援俄承惠挫於亳州賊趨蘭儀分擾通許尉氏益近會城急自鹿邑馳抵陳留令諸軍夾擊偕巡撫瑛棨疏

聞

詔責徒事尾追著著落後未幾賊南走許州告警馳援之而賊由臨潁趨舞陽復分緣鄆城之洪河而西期於舞陽復合令副將王鳳翔率騎兵馳扼洪河自以步軍繼進鳳翔擊賊洪河北岸敗之明日賊攻臨潁督諸軍戰城下有劇賊擁纛自其陳呼嘯出賊眾從之勢張甚我軍殊死戰陳擒擁纛者葵心親屬孫套也賊氣奪遂潰逐之並敗其踵至者夜遴精騎劫賊營又大破之拔難民千餘斬馘無算賊遂東奔偵別賊窟扶溝太康要之王隆集復敗而奔於是南路餘捻還



巢北路亦三戰三捷河南肅清明年

命勝保督辦河南剿匪事宜關保仍爲幫辦賊擾虞城夏邑

鹿邑遣將擊走之賊俄又大至逼近會城

詔詰關保駐鹿邑何以未截擊致賊深入令勝保據實以聞  
勝保疏陳河南鄰賊之處袤延千里無險可扼加兵力單薄防務視他省尤難此次賊近開封關保方厯周家口至項城汝陽扼剿東路聞警卽由睢赴援忠誠勇敢眾所共知復言其敗捻逆蔡溝追至槐店斗門斃賊數千狀

詔獎之尋戰汝甯碓山魏橋皆勝秋賊窺鹿邑旣設守仍遣

將破之劉集並解邱集之圍賊尋復糾眾來攻遣將間道出賊後與城中軍合擊賊大敗遁於是河南再肅清尋以舊傷發

給假調理同治元年之任黑龍江八年卒

安圖姓伊爾根覺羅氏吉林人隸滿洲鑲紅旗咸豐四年從征山東臨清州粵逆有功

賞藍翎移師湖北克漢陽八年賊自皖陷麻城黃安二縣隨大軍攻復之又越境敗賊

賞換花翎歷擢防禦十一年克孝感擊賊德安復勝

賜號圖蘇克特伊巴圖魯擢甯古塔佐領冬攻下德安府城



以協領卽補加副都統銜同治元年移師河南粵逆馬融時擁眾圍南陽勢張甚偕道員金國琛擊之白河塵戰三時許斬馘甚多圍立解

詔以副都統記名安圖生平戰功是役爲最著國琛故楚軍名將數當劇賊會與之偕故功成不旋踵云明年秋亳州捻逆由河南闌入湖北鍾祥縣境並分趨京山之宋河復東擾應山逼縣城偕總兵梁洪勝截擊數敗之殲賊無算

詔加都統銜調吉林佐領三年授拉林協領明年擢金州副都統

命之任十年雨傷稼鄉民以災報延不飭查致聚眾闖於署

事寢上

聞

詔盛京將軍都興阿等察辦十一年都興阿等以實覆奏下部議罷之尋卒

貴陞姓伊爾根覺羅氏吉林人隸滿洲正藍旗咸豐三年從征粵逆明年至江南攻九洑州賊壘有功

賞藍翎六年戰葛塘集冒險奪賊巢被創八年破全椒江浦交界大莊等處賊壘十年援金壇遇賊丹陽力戰被創明年歷擢三姓佐領同治元年擊卻江皖悍賊者



再

賞換花翎三年江北肅清用揚防積年禦賊功以協領卽補  
充吉林頭起委營總江甯會城克復加副都統銜調  
赴甘肅甯夏勦回逆明年駐定邊擊賊黃河兩岸連  
敗之

賜號呼敦巴圖魯五年授烏拉協領尋復甯夏靈州城及數  
攻破賊卡

詔以副都統記名八年秋賊以大眾逼河逆戰府谷縣十里  
長灘大破之河防解嚴

賞頭品頂戴未幾赴甯夏圍攻王家疃賊巢殞於礮

賜祭葬如故事諡謹武予騎都尉世職

詔祀京師及原籍昭忠祠死事所在建專祠靈柩回旗官爲

護送云

德英字潤堂姓何圖哩氏隸蒙古正藍旗世居吉林  
城北沙河父尤成額謹厚嗜讀書步趨宋儒爲左翼  
官學教習垂五十年學生頌之不置事繼母孝妻關  
有懿行亦知書德英其長子也咸豐二年以附學生  
委筆帖式從征粵逆戰江皖之交有功

賞藍翎五年戰江浦縣七年戰淮安徐州府境甚力

賞換花翎歷擢佐領明年隨



欽差大臣勝保剿北路捻逆破賊圩十餘以協領卽補九年以病乞回旗同治元年起授協領明年署阿勒楚喀副都統奉天昌圖廳盜犯王五糾眾劫略闖入吉林既擊走之餘賊據通溝岡率軍殄除殆盡加副都統銜卽真四年入

覲

命署吉林將軍有頃奉天遼陽州賊起官兵失利賊北走詔吉林嚴防又以吉林伏莽甚多

詔並爲備當是時吉林各軍悉調東南討賊疏請神機營留演吉林騎兵百爲奉天所截留調回禦賊者再及請

徐州軍營所徹官兵馳回原省

詔並俟尙書文祥至奉天後商辦不得已乃練民團勸闖闖捐資餉之賊渠劉果發尋竄出圍場據一拉溪岔路河擾及旁近而王樂七馬傻子周榮暨各黨一時蠡起山中諸匪尋聲響應之佐領保隆參領常德等先後戰沒於是伊通長春雙城五常伯都訥拉林阿勒楚喀無慮皆賊矣伊巴丹站道梗賊逼烏喇街去會城裁七十里會城故土垣德英擁市人以守莫不危之而其氣殊厲徒步雜士卒巡檄會劉果發周榮相繼斬獲疏調留演出征軍皆回援文祥及署黑龍江



將軍寶善並奉

詔遣軍與蒙古郭爾羅斯兵以次至聲威既壯兼部發餉銀五萬兩士飽馬騰羣賊略就殄餘散走諸山中鬍子由是萌枿焉鬍子吉林以稱盜厥後邊防宿重兵時肆劫略不敢輒揭竿然有數十人連陷二城易鞬而撫者日益滋甚民不聊生乃懸之著令獲鬍子五與彙保將領以下甘心焉有司鞠非實出之則譁為賄縱於是歲誅千數百訖不少衰其放卡之兵首鼠兩端為德於盜者閒有而吉林地瘠早寒穫少一夫所受什古制猶贏中田而廬無守望之助故鬍子易逞

策之但去著令仿富俊屯堡其民

詳宦迹本傳

資無籍者

部勒之使屯田邊界而已明年德英丁父憂百日孝滿回阿勒楚喀本任部議褫職治陷屬城罪

穆宗以籌兵籌餉卒保會城改革職留任六年調吉林副都統尋署黑龍江將軍明年春疏請緩呼蘭廳所屬巴彥蘇蘇等處被災租賦及齊齊哈爾城墨爾根城旗營屯站歉收請借給籽種口糧並

俞之八年夏

詔簡馬隊五百遊員率赴甯夏將軍穆圖善軍疏言治裝銀貸自商人應由部撥款以償



詔如所請秋卽真十年以黑龍江附近蒙古荒  
杜爾伯特協理台吉那遜烏爾吉等擅  
不聽而副管托蒙阿等復以努毓河北  
荒地擅請撥放分別劾罷之十二年疏  
飭部咨會各省協餉依限解清並補解歷年積  
龍江山場荒地招墾後或窩藏匪盜現  
以絕其源呼蘭等處雖禁止開墾仍有  
攬地畝轉售漁利等弊請  
飭部定章示懲又黑龍江新設理事同知所轄  
繁銓選之員經年始至請以此缺歸奉

地例禁開墾  
行招墾止之  
克音河南之  
陳餉紬請  
欠及吉林黑  
已編查戶口  
奸民土豪承  
遼闊人雜事  
天揀發人員

內遴補庶邊地收得人之益及奉天旗  
林黑龍江者多至千餘戶請

民近年徙吉

飭該將軍下所屬旗佐隨時稽察期有限制  
詔並從之明年春卒

衛

穆宗悼惜焉

賜祭葬如故事諡曰莊毅予其子忠清藍翎侍

白旗世居吉

伊興額字松坪姓何圖哩氏隸蒙古正  
林父德林保性勇敢以佐領從征臺灣

四川戰輒冠

軍

賜號珠克圖巴圖魯



賞戴花翎伊興額少孤家貧躬耕牧冬入山樵採手足重繭  
意豁如也道光十年從征喀什噶爾次肅州事平十  
九年以人材挑選入都授侍衛擢入滿洲正白旗二  
十一年英夷內犯出防浙江海口明年還京尋以病  
假歸咸豐三年粵逆擾兩湖東南騷動請赴軍冀得  
當以報於是隸

欽差大臣琦善於揚州明年賊來犯以騎兵擊之北門賊敗  
去尋戰三汊河及浦口並勝旣而賊復犯揚州偕總  
兵武慶擊敗之明年攻毀浦口賊營累擢頭等待衛  
五年江南大營以副將吉連扼對江石磧橋而水軍

泊三山與相犄角水軍俄沂江上陸路勢孤賊分兩  
路逼石磧橋眾號數萬時以偏師屯浦口語武慶曰  
吉軍破且及我當往救答曰專令可乎曰事已亟救  
鄰軍之危獲專令之譴請以身當於是偕總管西昌  
阿夜進黎明薄賊壘會天大霧礮矢齊發譙聲雷動  
賊大駭不知軍所從來且不辨多寡遂空壘以奔吉  
連亦出兵夾擊斬級三千餘乘勝復江浦西解和州  
圍所斬賊及自溺死者踰萬六年調勦捻逆時賊渠  
任仲勉據南屏築礮臺自固師進滄河北岸賊來戰  
騎兵張兩翼抄擊之槍無虛發賊敗自相踐蹋死者



以二千計河水爲斷流躡擊至南岸斬仲勉餘賊悉就殲尋破賊渠李大喜於宿州孫疇等集又擊敗白任乾宿州城下解其圍多所斬馘逆首張樂行逼徐州擾及永城縣偕徐州鎮總兵傅振邦禦之陳獲賊渠孟繼民賊驚潰逐北十數里而宿州灘口爲安徽賊眾所據復偕振邦分路攻之殪賊甚夥追擊過河回勦永城據賊偕振邦戰究家集大捷進平鐵佛寺柳子集呂家橋諸賊巢賊擾潁上偕總兵郝光甲擊敗之會河南官軍攻賊雉河集自潁上馳助斃賊七百有餘羣賊尋復萃徐州圍郡城旁擾蕭碭豐等縣偕振邦等并力戰守圍旋解

詔以副都統記名

賞戴花翎賊渠王廣愛梁振貴糾眾張家七樓號數萬議北竄將擊之所部步軍二千騎什之一眾寡遠不侔因於夜半先以騎銜枚疾馳毀壘垣直入獲廣愛振貴賊黨驚擾旣拚死命來救率騎然槍縱橫四突賊皆辟易會步軍繼至賊益不支殲之殆盡授正紅旗蒙古副都統傳此授在八年然行狀云爾宜非謬明年賊渠李月自三河尖北竄月劇賊善戰則堅壁持之訶知賊黨有陳保元者頗能事母陰使人致之令書招保元保元猶豫



則單騎往曉以大義保元以其眾五千降月大驚宵遁追擒之大陳集軍興來號名將者大抵持士卒血肉與礮火競短兵接者希矣矧用閒伊興額官侍衛京師自以少失學喜從通人遊用稍稍知古兵法故攜保元獲月平劇寇旬日間雖然儒者亦多秉節鉞豈兵書不之讀而覆敗相尋顧其能用否耳於是

賜號額圖渾巴圖魯以病回徐州療治爲

欽差大臣勝保所劾

詔摘頂翎仍責後效尋破賊渠梁思柱於鄆家墟劉大淵於喬家廟獲思柱殪大淵復借總兵史榮椿破趙家屯

賊眾渦河南岸賊巢悉平

賞還頂翎八年攻賊宿州紀家莊敗之俄自臨淮躡賊至蒙

城破其眾盈萬戰賊薛家湖斬三百餘級攻湖東西賊巢礮傷右骹裹創進卒破平之

賞頭品頂戴進剿宿州以南多所俘斬與逆首張樂行戰賴亳之墟自辰至午閱三時斬千餘級而賊渠劉天祥以數萬眾自六安北竄孤軍慮爲所乘退屯蕭縣將伺便擊之而豐縣陷於賊坐禡職明年起原官時傳振邦督辦三省剿匪事宜

命爲幫辦接統太僕寺卿袁甲三所部而逆首劉天福圍我



濟北軍方亟外環賊營二十四令騎兵裹糧直陷重圍自內反攻向外外兵與夾擊賊潰鳧漕河遁圍立解

詔獎焉疏調翰林院編修李鴻章工部主事于凌辰赴軍詔如所請後鴻章身都將相功名盛一時其去近侍治軍始此知人之明與以人事

君之忠伊興額幾幾與駱秉章胡林翼曾國藩諸名臣爭烈矣尋

命督辦河南勦匪事宜躡賊至商水縣老湖坡令佐領穆克德布富亮分道進而自繞出賊後夾擊賊潰逐北至

太和縣孫家圩斃賊二萬有奇

詔獎焉又偕傅振邦破賊袁家集多所斬獲勝保劾商水之戰不救舞陽又所上首功不實

詔革去頭品頂戴旋褫職舞陽者去商水二百里有奇戰商水日總兵邱聯恩同日戰沒舞陽勝保所劾時論不以爲伎諛謂若當是役必能分其身半戰商水半救舞陽云十年病回京師都察院奏安徽監生張鴻文呈稱伊興額在軍士皆用令遠近悅服請加重柄仍總辦勦匪事宜毋令牽制必能迅掃賊氛報

聞秋京師戒嚴王大臣知謀勇兼資與策戰守會和議成科



爾沁親王僧格林沁請與南征

給六品頂戴道出濟甯紆鄒縣謁孟子廟呼諸將羅拜曰彼丈夫也我丈夫也數語每誦之輒自壯願共勉之進及僧格林沁徐宿間其民焚香夾道迎拜僧格林沁謂迓己也好語謝之拜者不解所語但曰聞伊都統來吾輩不復憂賊故拜迎僧格林沁歎其得民心如此爲疏

聞

賞三品頂戴辦理徐宿民團事宜時以故將復起舊部曲多不隸麾下所將五百騎及增募者練未成軍而賊竄

曹單迤東近接畿輔奉急檄與徐州鎮總兵滕家勝裏五日糧北援及賊汶上家勝爲前行鼓饑疲士赴之賊眾圍我數匝家勝戰方酣馬躓死家勝故所部驍將累立戰功聞其被圍率百餘騎馳入索之不得復潰圍出賊亦麇集然不敢近皆四遠圍之憤甚橫刀縱馬突賊厚處亂斫所斬刈過當竟沒於陳百餘騎悉殉時十一年春也夫捻逆蠡起原於粵逆東豫江皖之交無慮皆是當其糾結而出或卓旗於門門有籍籍與者之名期以時日婦人至市衣釧易馬壯夫之行視若商販所過肆焚掠不攻堅不久頓爲官



軍所逼閒逞其鋒既屢捫載歸處賢於力耕矣當時  
章奏往往云逼使歸巢巢安在歸不復出乎蓋黠而  
難制實甚粵逆彭毓橘劉銘傳並湘淮名將或覆或  
亡僧格林沁亦殉疆場僧格林沁忠勇蓋世顧其辦  
賊相與馳逐無所謂謀謨不免如

文宗責關保徒事尾追著著落後伊興額有儒將風且知用  
閒獨數起數蹶當一面無幾時而其卒亦不能不致  
於賊惜也事

聞  
詔復原官

賜祭葬如典禮

予諡壯愍給其子盛福騎都尉世職而立功所在及吉林故

籍

許建專祠

金順字和甫姓伊爾根覺羅氏吉林人隸滿洲鑲藍  
旗少孤貧事繼母孝性忠懿樸勁踰冠從戎崎嶇三  
十餘年入死出生與軍事相終始非偶然也咸豐三  
年粵逆竄山東隨大軍禦之以功授驍騎校

賞藍翎六年隸副都統多隆阿敗賊湖北麻城蘄州尋破之  
黃梅縣



賜號圖爾格齊巴圖魯

賞換花翎九年攻安徽太湖諸賊壘克之明年助楚軍克太湖歷擢協領加副都統銜冬我軍圍安慶逆酋陳玉成擁眾自舒城廬江西上牽制我軍勢張甚多隆阿營掛車河嚴陳以待賊徑渡我軍三路迎擊戰方酣金順以騎兵出香鋪街貫賊中堅賊卻合軍逐北二十餘里賊壘悉平賊渠黃文金糾捻逆渡江規與玉成合逆擊之新安渡斬馘甚夥當是時多隆阿以荊州將軍將騎提督鮑超將步軍行輒相輔爲賊所畏號多龍鮑虎東南諸統將無與抗行而金順故多隆

阿部將冠擊賊常爲軍鋒同治元年粵捻合據河南荊子關隨多隆阿攻克之明年多隆阿以

欽差大臣赴陝西剿逆回率所部從王閣村羌白鎮並賊老巢至立克之尋敗賊渭河剗平南岸賊寨

賞頭品頂戴進克高陵縣涇河迤北肅清乘勝破蘇家溝渭城賊巢三年漢南賊東竄鳳翔率騎兵逆擊於灃峪殪之幾盡全陝回務肅清方西安被圍賊眾號十萬晝夜力攻城中危甚所在援軍莫適先發金順所將數百騎耳出賊不意冒圍直入縱橫盪決賊遂土崩巡撫劉蓉盛陳其功稱忠勇有謀不避艱險每戰必



先馭軍尤嚴明有法授鑲黃旗漢軍副都統尋調西  
安副都統粵逆逼會城爲官軍所遏西奔督騎兵追  
及灃河東岸興隆鎮大敗之而逆酋悍黨麇集盤屋  
店子頭田峪口等處進軍南集賢村徧賊而壘直搗  
店子頭賊三路出禦麾騎蹂之賊陳亂所殪以千計  
毀其巢賊退據鹿門村各堡爲持久計旣而賊將攻  
淇水二堡偵知會諸軍截擊多所斬馘明年攻甯夏  
城南賊壘奪其礮臺固原賊合於逆回蔓延黃河兩  
岸率軍分三路趨黃渠橋寶豐南擊之斬逆酋孫保  
義等五年調甯夏副都統尋署甯夏將軍七年勦賊

定邊勝之而逆回竄據甯條梁陷懷遠犯甯榆南關

詔趣赴甯條梁秋師進榆林連戰皆捷賊走葭州遣將敗之

關山苑及張家坪明年復綏德州擊敗榆林賊尋聞  
陝賊圍甯夏疾馳抵纏金會提督張曜等軍大破之  
冬逆回趙五阿渾自陝來援王家疇偕張曜逆擊斬  
趙五阿渾進克馬泰納洪兩寨身被數創九年逆回  
馬化隆誘甯郡降回馬萬選復叛遣將擊走之尋以  
新渠甯郡防軍無多陝甘各回鱗集疏請濟師

詔提督宋慶率豫軍兼程以赴夏王家疇賊自牛頭山竄河

西會諸軍敗之黃渠口斬悍酋梅照喜等明年克王



家瞳

賞穿黃馬褂進攻通貴堡克之獲馬萬選餘賊窮蹙乞降擢烏里雅蘇台將軍疏言未能遽之任請暫統全軍進討甘涼鎮番諸賊

允之尋以還甯夏未報起程赴鎮番

詔褫職卽日督所部赴肅州道擊鎮番賊勝之會烏魯木齊提督成祿行抵金塔

詔速赴肅州統其軍十二年秋與

欽差大臣陝甘總督左宗棠會師肅州攻克之

詔復原官

賞還黃馬褂花翎勇號肅州旣復議出關役苦餉艱諸將多

內憚獨請行宗棠疏陳謂服其力顧大局會

詔以烏魯木齊都統景廉駐古城兵力甚薄

命率所部二十營赴之規復烏魯木齊於是遂發出關數十里卽瀚海軍忽不行問之則曰先鋒營駐有所議知且變疾從數騎馳視有三弁迎陳所以手刃斬之營官偕一哨官至復刃之營官書記在旁曰奈何不令一言又刃之麾其軍曰敢留者視此於是角聲嗚嗚軍以次行駐馬視過盡乃列六尸拜之曰雜賦豆麩不飽佐以野蔬天下無若西軍苦此行度戈壁並乏



水草吾非不知但不忍汝六人如全軍何如

國家何又如關內生靈何遂放聲大哭聞者由是知盡瘁事

國苦心矣道授正白旗漢軍都統明年至古城與景廉會師因演礮兩軍外漢回觀者數百千人金順長身頰面微鬚額甚闊而銳下材官列侍大抵及其乳聲若洪鐘見之莫不聳異於是景廉所部指敗堵煙筒爲的擊之再煙筒無恙所部管帶開花礮隊總兵鄧增<sup>粵人</sup>幫帶參將張玉林<sup>江甯人</sup>拉礮進且日許大煙筒何足擊請捲旗卓之爲的玉林測視畢請於金順又

測視畢礮響旗飛如翦霞空際旣而增亦爾觀者謹呼聲震遠近逆回聞之氣奪尋

命幫辦新疆軍務光緒元年調烏魯木齊都統先是逆酋白彥虎糾脅賊眾竄瑪爾斯據爲老巢時窺古城勢復熾明年進軍攻之旣拔黃田賊卡長驅古牧地破其堅壘連下烏魯木齊廸化昌吉呼圖壁各城直逼瑪爾斯陳斬僞元帥馬興南北兩城相繼克

賞戴雙眼花翎子雲騎尉世職調伊犁將軍四年攻克西四城回疆底定率軍收還伊犁鎮之十一年入

覲道卒



詔給銀千兩治喪靈柩回旗官爲護送

賜祭葬如典禮加太子太保銜

予諡忠介初金順婚託莫洛氏逾月屬事繼母撫諸弟遂出而轉戰數十年至新疆乃遣奉一品夫人

誥命迎之謂使者曰太夫人老矣甯能涉萬里吾義不得獨行且彼處盛姬侍能多育子姓宗祧不墜吾又何求遂不往時爭賢焉而金順故隸多隆阿其取受頗異又於幕府士不能禮下士以故多去之他軍其會攻王家疇他將幕府豫草奏以待旣克卽發金順功實最徒以入告之後

賞次他將時不以他將爲攘功謂金順失士宜爾此并篤論

然旣開幕府又可使虛無人哉

花哩雅春吉林人其氏與所隸之旗未詳咸豐初從征新疆以戰創回旗調理道出奉天廣甯時馬賊不靖擾及

興京廣甯民懼將他徙謂曰無懼賊眾烏合耳吾戰天山瀚海間嘗以百人破敵二千今從者四十人雖創殘之餘皆經百戰矧有城可憑何懼哉由是民恃以守賊至擊去之積前新疆功授

盛京副都統當是時賊有竄吉林者而敗或獲其礮則



興京守

陵者也署將軍德英以

聞

詔下其事奉天奉天覆言

陵礮無恙會德英以憂去繼者亦疏言覆驗非是也

德昌其氏未詳三姓陳滿洲隸鑲紅旗趨勇善戰咸  
豐八年出戍天津轉戰河南江蘇累擢防禦同治元  
年師旋會朝陽賊竄黑背山所在焚掠隨副都統富  
明阿攻之三家子陷陳爲軍鋒所殺過當而右膝亦  
被槍傷擢佐領先是

詔吉林選騎兵百赴神機營操演德昌率之往五年奉天馬  
賊日熾尙書文祥奉

命討之德昌以所部從戰中陽堡朝陽坡並捷明年破賊吉  
林大孤山游擢副都統光緒元年駐軍昌圖偵八家  
子餘孽復起其巢險甚阻之以守遴精騎往勦擒斬  
無遺

賜號博奇巴圖魯授騎都尉世職七年署伯都訥副都統  
旋調甯古塔副都統卒子某某襲世職兼二品廕生  
德玉琿春人其氏與所隸之旗未詳善火槍暇走一  
騎獵山中百發百中同治四年吉林所在皆賊賊窺



會城有備遂竄甯古塔逼瑋春時軍興徵調四出德  
玉雖以防禦留而守望不具賊至趨東門徑入舉城  
沸然德玉槍而騎獨馳逆之一槍賊渠殪再槍賊執  
旗之目殪賊連喪其酋大懼又沸聲四起慮有伏且  
自來無單騎臨戎者乃疑而遁以功擢協領是役以  
一人全城在古亦罕曾幾何日他事實乃一無所傳  
卽此傳於誰何亦幸耳惜哉惜哉



